

# Maagizo Ya Gabrieli Kwa Danieli

Jeffersonville, Indiana, USA

Julai 30, 1961A

1 Bwana akubariki, ndugu. Habari za asubuhi, marafiki. Ni joto sana, kuwa hekaluni asubuhi ya leo, lakini ni fahari sana kuwa hapa. Nina furaha sana ya kwamba tunge—tungeweza kuingia leo kwa ajili ya ibada hii. Na imetangazwa ya kwamba ningekuwa na somo sasa juu ya haya *Majuma Sabini ya Danieli*. Hizo zinaunganisha ile sehemu nyingine ya Ujumbe kabla sijaendelea na ile—ile Mihuri Saba. Ambapo ni, Mihuri Saba; Mapigo saba; Baragumu Saba; Ole Tatu; yule mwanamke katika jua; kutupwa nje kwa Pepo yule Mwekundu; wale mia na arobaini na nne elfu waliotiwa muhuri; yote yanatukia katikati ya wakati huu. Nami nilifikiri itanibidi niingize hili kwanza.

2 Sasa, kuna joto. Hatukusudii kukaa sana, kama tu tuwezavyo. Na huu ndio msimu, kwa kawaida, msimu wa likizo, ambapo watu hawaendi kanisani mara nyingi. Na, zaidi sana, na wote wana vyumba vyenye viyoyozu, na kadhalika, ambamo ni starehe. Laiti tungalikuwa na hayo, lakini kwa wakati huu hatuna.

Wengi wa babu zetu waliketi kwenye jua kali. Ninapofikiria juu ya kuomba msamaha kwa watu kwa kutokuwa na chumba chenye kibaridishi, mawazo yangu daima hupeperushwa mpaka Afrika ambapo walikaa kule kwenye zile tufani, na hao wanawake na nywele zao zikining'inia usoni, walikaa hapo mchana na usiku pia, bila kuondoka hata kidogo mahali walipokaa; hawali, hawanywi, wala cho chote kile, walikaa papo hapo tu ili wapate kusikia Neno moja, ama mawili, ya Bwana, mara kwa mara.

3 Ninaweza kukumbuka Mexico wakati ilikuwa kuna joto sana hata, kwa kweli, niliketi kwenye chumba cha kondishani na nikajaribu kujipepea, kulikuwa na joto sana. Na unawaona hao watu wakiwasili pale kwenye saa tisa za usiku, kwenye uwanja ule mkubwa wa michezo, na hawana viti, vya kuketi chini. Wagonjwa, wagonjwa hasa, wanaokufa, wagonjwa; kansa, kivimbe; na mama wagonjwa, watoto wachanga, wanaokufa na kadhalika, wamesimama papo hapo kwenye hilo jua kali linalochemka, bila kivuli mahali po pote, na mmoja akimwegemea mwingine tu tangu saa tisa za usiku mpaka saa tatu za usiku wa pili, ili wasikilize tu kwa dakika thelathini kupitia kwa mkalimani, na kuona kazi za Bwana. Wanaketi pale na kungojea, wamevaa nguo kubwa nzito zilizochakaa, wanazivaa hizo majira ya baridi na kiangazi. Hayo tu ndiyo waliyo nayo.

4 Na halafu ninafikiria juu ya kukaa kule kwenye misitu hiyo, jinsi ambavyo wangewaleta hao watu wagonjwa, ambao wasingeweza hata kusogea. Na huko India, wakati wao wangemlundika mmoja chini, halafu mwingine juu ya huyo, mwingine juu ya huyo, namna hiyo, wenye ukoma na magonjwa; ambapo wangewapitisha pole pole, na moja kwa moja huko barabarani, na kuwaweka kwenye hilo jua kali, linalochemka, jua la tropiki. Kwenye zile tufani, na umeme ukimulika, na mambo ya namna hiyo, wao wangelala papo hapo kwenye jua hilo na tufani, na kila kitu, bila kusogea wala kulalamika hata kidogo, ili kuninii tu...na kujaribu kupata Neno la Mungu, mara kwa mara, kitu fulani kwa ajili ya nafsi zao. Sasa kwa nini sisi tuombe msamaha asubuhi hii, tukiwa tuna dari juu yetu, feni zinazunguka? Tunapaswa kuona aibu kama tukilalamikia jambo hilo.

5 Kwa hiyo ninakumbuka si muda mrefu uliopita, katika kisiwa fulani, kimoja cha visiwa huko Bahari ya Kusini, nilikuwa na ibada kule usiku huo. Na, loo, kulikuja tufani. Loo, sijapata kuona tufani kama hiyo, ni kimulimuli kimoja cha umeme baada ya kingine, vikiimulika hiyo nchi. Na jinsi upepo unavyovuma mpaka miti ilikuwa inalala kabisa chini. Nikasema, "Vema, wao wana ... Afadhali nivue suti yangu, kwa sababu hakutakuweko na mtu ye yote kule."

Punde lile gari dogo likarudi nyuma hata mlango, na mtu fulani akagonga mlango, tayari kuondoka.

Na nikamwambia kijana huyo, yeye aliweza kuzungumza Kiingereza, nikasema, "Kuna mtu ye yote huko chini?"

Kasema, "Hata huwezi kufikia urefu wa jengo la mji kufikia mahali pale," kwenye uwanja mkubwa wa mpira.

Ndipo nikasema, "Unataka kusema ya kwamba hao watu wako—wako huko nje namna hiyo," nikasema, "tufani yote hii?"

Wakasema, "Wao wanataka kusikia habari za Mungu."

6 Na—na kwa hiyo nikashuka nikaenda kule. Na kulikuweko na akina mama, vijana wasichana, matineja, si kudhiaki na kucheka, na kupasua puto za bazoka, wakizungumza mambo ya wavulana wao. Kila Neno, walilishikilia; wala hawakusogea, waliketi tu na kusikiliza. Nikafanya wito wa madhabahuni, kufanya tu wito wa madhabahuni, na maelfu wakasimama, huku majonzi yakiwatiririka machoni mwao namna hiyo, wamemwinulia Mungu mikono yao, wakiomba rehema kwa ajili ya nafsi yao, vijana wasichana na wavulana, umri wa miaka kumi na saba, kumi na minane. Siku hizi hata kwa namna fulani ni vigumu kuwafanya watu wazima wasikilize, mnaona. Hiyo—hiyo inaonyesha ya kwamba hatuna jambo la kunung'unikia. Mungu ashukuriwe! Naam, bwana.

Tungetaka mambo yawe yote ya kisasa kama Wamarekani wengine, lakini hatuna ya jinsi hiyo; kwa hiyo tutaridhika tu na tuliyo nayo.

7 Sasa, nina jambo dogo nililoona ambalo ningetaka kulifanya hapa maskanini tena. Ni wangapi walio na Biblia, inua mkono wako. Vema. Hebu na tufungue Zaburi 99 kabla hatujaomba. Tulikuwa tukifanya jambo hili, Ndugu Neville, miaka mingi iliyopita. Sijui kama ... Hivi tayari mmesoma Zaburi asubuhi ya leo? [Ndugu Neville anasema, "La." - Mh.] La. Ninapenda tu, kusanyiko, kusoma baadhi ya Zaburi.

Leo asubuhi, nilipokuwa nimeketi kwenye chumba changu cha kusomea, nikiutafakari Ujumbe huu na Neno, nilifikiri, "Mnajua, litakuwa ni jambo zuri tena ku—kuwafanya wote wasome Zaburi. Ninapenda kufanya hivyo sana."

Sababu ya mimi kuchelewa kidogo, walinipigia simu ya kutoka mbali, kutoka huko Cheyenne, kwa hiyo hiyo ndiyo sababu nilichelewa.

Na sasa, wakati tunapofungua kwenye Zaburi hii, nina matangazo machache ninayotaka kutangaza, niliyopewa sasa hivi. Hiyo ni Zaburi 99.

8 "Tangu sasa, matangazo yote kuhusu mikutano hapa maskanini, na katika mikutano ya nje, yatatoka kwenye ofisi ya Jeffersonville. Mtu ye yote anayetaka kujua juu ya mikutano hana budi kujiandikisha, ama kuacha jina lake na anwani, na kuliweka mimbarani mwisho wa ibada usiku wa leo. Utatumiwa kijikaratasi cha taarifa mapema upate kujitayarisha kuhudhuria mikutano."

Hiyo ni kusema, kama mtu ye yote katika siku zijazo akitaka kujua ni wapi hasa tutakakofanyia mikutano, tumeanzisha mfumo mpya, kwenye ofisi kule nje sasa, hivi kwamba unaweza tu kuweka jina lako na anwani hapa. Nasi tutakutumia kadi, mapema, ili ujue mahali mikutano hiyo inapoendelea, na labda na masomo yanayohusika, na cho chote kile kilichopo, kama ungeweza kupata nafasi. Mnaona, kama huna mahali rasmi inapotokea, mtu mmoja anasema jambo *hivi* na mwingine anasema *vile*, hu—hulipati, mnaona. Kwa hiyo hebu tu... Andika jina lako na anwani na kuiweka hapa, na Billy Paul ataichukua na kumpa mhusika.

9 Sasa, iliulizwa, pia, kama kutakuwako na ninii zaidi... "Ndugu Branham, utakuwa na ibada nyingine zo zote za uponyaji maskanini, pamoja na upambanuzi?" La. La. Upambanuzi utatolewa na—na halmashauri yetu nyingine. Tuna Ndugu Neville hapa sasa ambaye ana kipawa cha unabii, ambaye anatabiria wagonjwa na kuwajulisha mambo wanayohitaji kujua. Na tuna ndugu mmoja jina lake Higg-... Higginbotham, mmoja wa...alikuwa mdhamini, ametumika vizuri kwenye bodi. Simwoni asubuhi ya leo, bali kwa kawaida yeye ana karama ya kunena kwa lugha. Na maskini bibi mdogo anayelitwa Arganbright, dada mdogo wa kupendeza ambaye ana karama ya kufasiri lugha.

10 Na jumbe hizi zinathibitisha kwamba zinatoka kwa Mungu, kwa maana kwa kweli hazitolewi nje ya utaratibu, ziko katika utaratibu kabisa. Na mara karama hizi zitakapoanza kuongezeka, tutajaribu kuninii—kupata ninii...kuziweka sawasawa katika kanisa, jinsi ya kuzitumia. Nami nitaonana nao hivi karibuni sana, na ili kwamba ninii—ninii—mikutano hiyo itaendelezwa kikamilifu kabisa katika utaratibu wa Bwana, kikamilifu tuwezavyo kuiweka.

Lakini watu hawa wapendwa, ndivyo asemavyo jirani yangu, Bibi. Woods, ambaye amechomeka maikrofoni yake hapa, na kinasasauti kule nyuma, apate kuurekodi mkutano, kusudi tu apate jumbe hizo, na kuziorodhesha, na kuona kama ni za kweli ama ni za uongo. Mnaona? Hivyo ndivyo anavyozichunguza. Namjua Bibi Woods kuwa mwanamke mwaminifu. Naye ananiambia juu ya mambo mengi ambayo yamesemwa, yanakuja kutimia.

11 Sasa, kwa hiyo tunashukuru kwa ajili ya jambo hilo. Ni msaada mkubwa jinsi gani jambo hilo lilivyo kwangu pale nyumbani, ninaporudi nyumbani, wakati huo. Huo upambanuzi upande wa kinabii hunichosha sana, na, kwa hiyo, Mungu amenitumia msaada kwa jambo hilo, kupitia unabii, na kunena kwa lugha, na kufasiri, ambako ni unabii. Ambapo, ni unabii, kunena kwa lugha. Kuna watu wawili mbalimbali wanaotabiri. Mmoja ananena, mwingine akifahamu yale huyo mwingine anayosema katika lugha zisizojulikana, ni unabii hasa. Na sasa tutakuwa ... Tuna jambo hilo kila siku, kila mkutano hapa wakati tunapokuwa na mistari yetu ya maombi katika mkutano.

12 Sasa, kuna mtu fulani basi angeuliza, ninii...juu ya karama. Ndiyo, ningali ninayo. Lakini kwa njia hiyo, namna pekee ninavyoitumia, ni katika mazungumzo ya faragha, ambayo huwa nayafanya. Na, ili kuyapata, ninaamini wameyaandika hayo kwenye ubao wa matangazo kule nyuma, kupata ruhusa na kuweka wakati wako katika utaratibu, na Billy Paul, kijana wangu, kwa maana hapa ama kwenye mikutano baada ya hapa. Huko kazini, po pote pale, huna budi kuwa na kadi ndogo ambayo Billy Paulo atakupa. Kama kuna jambo fulani maishani ambalo huwezi kulielewa, wala hujui jinsi ya kuondokana nalo, nawe unatafuta hekima ya Bwana, basi hebu... Mwone Billy Paul, mwanangu, ambaye ndiye katibu, naye atakupa kadi ndogo, na kukupangia tarehe, kwa zamu.

Ndipo basi wakati tunapokuwa na mazungumzo hayo, basi wakati huo utakuwa ndio tutakapoinjia

ndani pamoja, wewe na mimi tu. Na endapo ni wanawake wanaokuja, utaingia na mimi pamoja na mke wangu. Ndipo utaninii... Tutapata kujua, na kumsihi Bwana na kumwomba yakulazimu ufanye nini.

13 Sasa, vingine, mambo madogo na kadhalika namna hiyo, yanapelekewa Ndugu Neville, na Ndugu Higginbotham, na Dada Arganbright, na hao wengine wanaonena kwa lugha na kufasiri, ambao wako humu kanisani.

Kwa hiyo, tuko kama katika safari. Ninaamini ilikuwa ni Yethro, aliyemwambia Musa siku moja, mnaona, "Hebu na tuchukue baadhi ya wazee." "Ndipo Roho wa Mungu akatolewa toka kwa Musa na kuwekwa juu ya wale wazee sabini, nao wakatabiri. Lakini mambo makuu na magumu tu yalimjia Musa peke yake." Sasa, sisi si Musa, wala hawa si wale wazee, lakini tungali tunamtumikia Yehova Mungu, na Nguzo ile ile ya Moto ikiongoza kwenye Nchi ya ahadi.

Kwa hiyo, basi, naam, kutakuweko na wengine, kutakuweko na mikutano na kutakuweko na kufasi... Upambanuzi utakuja. Jambo hilo litakuwa likinipa nafasi basi kuwa katika maombi na kusoma, siku ambazo ninajua ya kwamba mazungumzo haya yatakuja, nipate kuwa tayari kwa ajili yake.

Sasa kumbukeni, Billy Paul Branham, katibu wetu wa mikutano, ataninii... Yako kwenye... Matangazo yako kwenye ule ubao kule nyuma, yamewekwa na wadhamini. Nina muhtasari hapa wa kutangaza hayo, na kuwaambia watu wanaweza kuyasoma kwenye ubao wa matangazo, wakitoka.

14 Sasa, sasa, asubuhi ya leo tuna somo kubwa, na usiku wa leo tutajaribu kuendelea nalo. Na, Bwana akipenda, Jumapili ijayo, lingine, tutaendelea nalo. Sikujua jinsi lilivyokuwa likiingia katika kilindi mpaka nilipoanza kulisoma. Na lingali ni siri kwangu, bado, na kwa hiyo ninamtegemea tu Bwana.

15 Sasa, ninyi mlio na Biblia zenu, hebu na tufungue Zaburi 99, 99. Nami nitasoma aya ya 1, kusanyiko litasoma aya ya 2, kisha sote pamoja tutasoma aya ya mwisho. Tutaendelea mbele; mimi, ya 1; kusanyiko, ya 2; mimi, ya 3; kusanyiko, ya 4; na kuendelea hata aya ya mwisho, kisha sote tutaaisoma pamoja.

Je, tusimame tunapolisoma Neno la Mungu. [Ndugu Branham na kusanyiko walisoma Zaburi 99:1-9 kama alivyoonesha — Mh.]

*Bwana ametamalaki, mataifa wanatetemeka; Ameketi juu ya makerubi, nchi inatikisika.*

*BWANA katika Sayuni ni mkuu, naye ametukuka juu ya mataifa yote.*

*Na walisifu jina lako kuu la kuhofiwa; maana ni takatifu.*

*Nguvu za mfalme nazo zapenda hukumu; wewe ndiwe uliyeithibitisha adili; ulifanya hukumu na haki katika Yakobo.*

*Mtukuzeni BWANA, Mungu wetu; sujuduni penye kiti cha miguu yake; ndiye mtakatifu.*

*Musa na Haruni miongoni mwa makuhani wake, na Samweli miongoni mwao waliitia jina lake, walipomwita Bwana aliwaitikia.*

*Katika nguzo ya wingu alikuwa akisema nao. Walishika shuhuda zake na amri aliyowapa.*

*Ee BWANA, Mungu wetu, ndiwe uliyewajibu; ulikuwa kwao Mungu mwenye kusamehe ingawa uliwapatiliza matendo yao.*

*Mtukuzeni BWANA, Mungu wetu; sujuduni mkiukabili mlima wake mtakatifu; maana BWANA, Mungu wetu, ndiye mtakatifu.*

16 Na tuinamishe vichwa vyetu.

Hakika, Bwana, Maneno haya yameandikwa na kuchorwa na mtumishi Wako, Daudi, katika Zaburi Kwako. Wewe unaishi katikati ya Makerubi. Ndiwe mtakatifu, na kilima chako ni kitakatifu. Na tukaribie huku mioyo yetu imenyunyiziwa Damu ya Bwana Yesu, tukiwa na dhamiri safi, na pamoja na imani na matumaini ya kwamba tunakuja katika Uwepo wa Mungu wetu. Jalia kusanyiko lote hili asubuhi ya leo liwe na uchaji. Fungua masikio yetu ya ufahamu. Nena kupitia kwetu, katika hekima, kusudi tupate kujua jinsi tunavyoweza kuenenda katika siku hizi na katika Uwepo Wako.

17 Tungekuomba Wewe, Mungu wetu, kutufunulia mambo haya ya siri ambazo zimefichwa miaka hii yote, tunapokaribia moja ya Maneno manyofu sana na yenye uchaji. Wewe ulinena juu yake ulipokuwa hapa duniani, na kusema, "Yeye asomaye, na afahamu." Kwa hiyo, kwa neema kuu sana tunakuja Kwako, Bwana, na kutafuta hekima Yako, bila kujua tu la kusema. Tumepanga hapa Maandiko machache, na kwa uchaji tukikutumainia Wewe kabisa tupate jibu, si kwa kusudi lingine bali kwamba tujue saa tunayoishi, tupate kuwa tayari kwa ajili ya mambo makuu yaliyo mbele. Tujalie jambo hilo, Bwana, katika Jina Lake Yeye aliyetufundisha sisi sote kwamba tunapaswa kuomba namna hii! [Ndugu Branham pamoja na

kusanyiko wanaomba pamoja kulingana na Mathayo 6:9-13.—Mh.]

... *Baba yetu uliye mbinguni, Jina lako litukuzwe.*

*Ufalme Wako na uje. Mapenzi Yako yatimizwe duniani, kama huko mbinguni.*

*Utupe leo riziki yetu.*

*Na utusamehe deni zetu, kama sisi nasi tuwasamehevyo wadeni wetu.*

*Na usitutie majaribuni, lakini utuokoe na yule mwovu: Kwa kuwa ufalme ni wako, na nguvu, na utukufu, hata milele. Amina.*

18 Ketini. Sasa, kama ye yote anataka kuvua koti lake, jisikie kufanya hivyo. Na wale wanaosimama ka—karibu na ukuta, kama miguu yenu ikiuma, mbona, jisikieni tu huru kutoka nje.

Na sasa, nafikiri, kama watoto wanataka kwenda kwenye vyumba vyao, ama tayari wameenda? [Ndugu Neville anasema, "La, hawawezi. Hatuwezi kuwa nayo asubuhi ya leo, kwa sababu ya umati wa watu."—Mh.] Mchungaji anasema ya kwamba umati wa watu umejaa kwenye hivyo vyumba, kwa hiyo hatuwezi kuwa na shule ya Jumapili kwa watoto wadogo. Nasi tungefurahi kama ninyi watoto wadogo sasa mngeshirikiana nasi, kwa kuwa asubuhi ya leo tutakuwa, tunaanza, Ujumbe muhimu sana, sana ambao nina hakika utakuwa na maana sana kwa baba yako na mama, na wapendwa wenu walio hapa, na hata kwenu ninyi watoto. Kwa hiyo, tunauendea kwa kicho sana.

19 Bwana akipenda, asubuhi ya leo tunachukua somo la majuma sabini ya Danieli. Na asubuhi ya leo tutazungumzia juu ya Daniel akiwa uhamishoni, na Gabrieli akiruka kuja kumjulisha mambo yajayo. Wakati Danieli alipokuwa akiomba, Gabrieli, yule Malaika, alikuja kumjulisha.

Usiku wa leo, ninataka kuzungumza juu ya sababu sita za kuzuru Kwake, masomo sita mbalimbali yatakayoletwa usiku wa leo, aliyojia Gabrieli.

Jumapili ijayo, Bwana akipenda, ninataka kuweka sababu na wakati wa zile Nyakati Saba za Kanisa, na kwamba ziko kwenye wakati gani, na mahali tunaposimama leo. Hiyo ni Jumapili ijayo asubuhi, Bwana akipenda.

20 Sasa, sababu ya jambo hili. Nilileta mihtasari midogo kutoka kwenye Jumbe zangu chache zilizopita. Na asubuhi ya leo ninataka kuyarudia kwa kifupi, kwa sababu huu unanaswa kwenye kanda za sumaku ambazo zitaenda ulimwenguni kote, mataifa mengi. Na, daima, sababu ya mimi kuyarudia kifupi, ni kwamba labda mtu fulani angesikia kanda hiyo kwa mara yao ya kwanza, na asingeweza kuelewa niliyokuwa ninamaanisha wakati ninaporejea nyuma kwenye jambo lingine.

Sasa tumechukua miezi mingi katika kujifunza Kitabu cha Ufunuo, Ufunuo wa Yesu Kristo. Tumepitia katika nyakati za kanisa. Zile sura tatu za kwanza za Ufunuo zilikuwa ni zile nyakati za kanisa. Halafu Yohana akatwaliwa katika sura ya 4 na ya 5, na akaoneshwa mambo ya—yatakayotokea baadaye. Sasa, kwenye sura ya 6, yeye anashuka duniani tena, kuona mambo yakitukia ambayo yataendelea kutoka sura ya 6, aya ya 1, mpaka sura ya 19 na aya ya 21. Ndani hapa inakuja ile Mihuri, yale Mapigo, zile Ole, wale nzige, yu—yule mwanamke katika jua, na kutupwa nje kwa lile joka jekundu, kule kutiwa muhuri kwa wale mia na arobaini na nne elfu, na mambo haya yote.

21 Hili limekuwa ni juma la kusoma kwa ajabu sana. Jana, siku nzima, ilikuwa vigumu kwangu kuondoka chumbani, nikijaribu kusoma. Na ni jambo fulani katika wakati wa mwisho, wengi wa watu wa zamani hapa, niliofundisha, nilisema tu, "Ndani humu kuna majuma sabini ya Danieli," lakini sikujaribu kuyaingilia, kuyaelezea. Lakini wakati huu, kwa neema ya Mungu, nimechukua jukumu mimi mwenyewe kujaribu kuomba neema mbele za Mungu, ili kwamba niyaleta kwa watu. Na ndani humu ninapata mambo ambayo sijui neno juu yake.

22 Na, basi, ni—nimekuwa nikisoma kitabu cha Dk. Larkin, kitabu cha Dk. Smith, mihtasari ya Dk. Scofield, mafafanuzi mbalimbali ya watu kila mahali, na hata hivyo siwezi kuweka yao pamoja kuyafanya yawe sahihi. Mnaona? Kwa hiyo, juma hili ninapanga, nimekuwa nikitembelea maktaba huko Kentucky, juu ya baadhi ya elimu ya kale ya nyota kalenda na nyakati, na nikichukua kutoka kwenye maktaba mbali mbali, na kadhalika, vitabu vyote vya kale ninavyoweza, na yale madogo ninavyoweza kufanya, nami nikiweka matumaini yangu kwa uchaji katika Yesu Kristo kunifunulia.

Kwa sababu, sitaki iseme, "Ninajua jambo *hili*, na ninajua *lile*." Yeye anaujua moyo wangu. Yeye ananisikiliza. Lakini ninazitaka, nipate kuwaangazia nuru watu Wake, kwa hiyo ninaamini ya kwamba Yeye atanipa hilo. Sijui bado, lakini ninamtumainia kwa ajili ya Jumapili ijayo, kwa maana hiyo ndiyo itakayokuwa sehemu iliyo muhimu sana, Jumapili ijayo, kuyajua na kuyaweka majuma hayo sabini.

Kila moja lina mahali tofauti. Na unapofanya jambo hilo, ukiyapitia yote, hayaji sawa, hayaingii. Hayawezi. Na, kwa hiyo, na—naweza nisyaweke sawa, lakini nitamtumainia Bwana kwa hilo.

23 Nami ninakumbuka kuhusu Sulemani wakati mmoja akiomba na kumwuliza Bwana Mungu kama angempa hekima, si kwa ajili yake mwenyewe, "si kuongezewa siku, si maisha marefu, si utajiri," lakini kwamba kwamba apate kuwa na hekima kujua jinsi ya—ya—ya kuwahukumu watu wa Mungu. Na Mungu akaliheshimu ombi hilo, na kumpa Sulemani hekima hiyo, kwa maana ilikuwa ni kwa ajili ya watu Wake. Na hiyo ndiyo sababu ninamwomba Mungu kuniruhusu nijue haya majuma sabini yanamaanisha nini, kwa sababu ninajua ndiyo kalenda halisi kwa ajili ya wakati tunaishi. Na, kwa hiyo, ninataka kujua jambo hilo; si kwa ajili yangu mwenyewe, mimi...si kwa ajili yangu mwenyewe. Bila shaka, ninataka kujua jambo hilo. Sisemi hivyo, "Si kwa ajili yangu," kwa maana ninataka jambo hilo kwa ajili yangu mwenyewe. Ninataka kujua, kwa sababu ninataka kujua mahali gani tunapoishi na ni wakati gani tunaishi. Na, basi, ninajua ya kwamba amenipa hilo.

24 Na watu mbalimbali wamekisia jambo hilo, nao wameliweka huko nyuma kabisa. Jamaa mmoja, nilikuwa nikisoma, aliyafanya yote kuishia katika mwaka wa 1919, yale majuma sabini. Vema, hilo halikuwa hivyo.

Kwa hiyo, baada ya yale majuma sabini, baada ya yale majuma sabini, mambo yote yamekwisha. Kwa hiyo sisi—sisi hatunini ... Tunataka kujua Kweli. Nami ninamwomba Mungu anipe Kweli.

25 Sasa, ili kuliwekea jambo hili msingi, kurudi nyuma, ninataka kurudia kidogo nyuma. Kwa hiyo, basi, mihitasari mifupi fulani niliyoandika, ambayo tulikuwa nayo katika sura ya 5, ya 4 na ya 5, ili kwamba watu wafahamu. Kwanza, kabla hatujafanya jambo hili, ninataka kurudia ya nyuma kidogo, ili kwamba mlipate kutoka ya 4...

Sasa, kumbukeni, sura ya 3 ilikuwa ni Wakati wa Kanisa la Laodikia, na Kanisa lilitwaliwa mwishoni mwa Laodikia.

26 Sasa, nilikuwa nikijaribu kumwelezea mke wangu jambo fulani kuhusu hilo. Tulikuwa na Becky, binti yangu, pamoja na namna zote za kamusi mbalimbali na vitu ambavyo tungeweza kupata. Havinipi jawabu. Nikachukua kamusi ya Biblia. Nikachukua kamusi ya kale ya Kiyunani. Ni—ni kachukua Kamusi ya —ya Websters na nyingine nyingi, kamusi za kisasa. Hakuna hata moja ya hizo ingeweza hata...kutoa maneno ama jibu, kwa njia yo yote.

Mke wangu akasema, "Unawatarajiaje watu wetu, ambao ni watu maskini, na wengi wao hawana elimu kama sisi pia tusivyo nayo, kufahamu mambo kama hayo?"

Nikasema, "Mungu atatoa jibu."

Hata liwe gumu namna gani, Mungu anaweza kulivunja-vunja na kulifanya rahisi. Kwa maana sisi ni... sehemu ya hao watu wanaotamani, wakiomba kwa ajili ya siku hiyo na saa hiyo. Na macho yetu yameelekezwa Mbinguni, nasi tunakungojea Kuja Kwake. Nami nina hakika kabisa kwamba Yeye atatuonesha. Sasa, haitasema ni siku gani ama saa ipi, maana hakuna mtu atakayejua jambo hilo, lakini hakika itatwambia ile siku ya juma tunayoishi, kama tunaweza tu kuzifahamu.

27 Sasa, katika sura ya 4, Yohana alitwaliwa mara moja, baada ya Kanisa. Yohana, alipokwenda juu, aliona wakati mzima wa Kanisa. Hapo ndipo ningetaka kusimamia, kwa sekunde moja tu, kusema, ya kwamba: watu wengi wanaotarajia mambo fulani makuu, ya ajabu, jambo fulani lenye nguvu kutukia, katika wakati wa Mataifa, hakika wamekosea. Wakati wa Kanisa, na yote hayo yatakayotendeka katika utawala wa Mataifa, yameorodheshwa katika Ufunuo 1 hadi 3, yote pamoja. Halafu Kanisa lilinyakuliwa na kutwaliwa, na haya mengine, mpaka sura ya 19, ni yale yanayotendeka kwa taifa la Kiyahudi, baada ya Kanisa kwenda juu. Na ni wakati wa ile Dhiki kuu, hakuna kitakachotukia miongoni mwa Mataifa; ni mauaji tu, na kadhalika, kama tutakavyofikia jambo hilo na kuona.

Lakini Kanisa, Lenyewe, limeondoka kwenye ya 13... Kwenye aya ya mwisho ya sura ya 3 ya Ufunuo, wakati Wakati wa Laodikia utakapoisha, ambao ulikuwa ndio wa mwisho.

28 Nasi tulichukua kila wakati wa kanisa, kila wakati, kila kitu kilichotukia, kila nyota, kila mjumbe, tabia yao, yale waliyofanya, na kulileta moja kwa moja katika historia mpaka yule wa mwisho kabisa, tukazichora pale pale kwenye picha, kwenye ukuta. Na wakati tulipomalizia, Roho Mtakatifu akaingia na kufanya duara ya jambo lile lile kwenye ukuta, na kulifunua Mwenyewe papa hapa kwetu sote.

Sasa, katika kufanya jambo hili, ninatumaini, mwisho wa jambo hili Yeye atakuja na jambo fulani la ajabu sana na kutuonyesha sisi tena ya kwamba tuko kwenye wakati wa mwisho.

29 Ni wangapi wenu walisikia ninii ya Kennedy...Hotuba ya Rais Kennedy, yale maoni na kadhalika? Ni wangapi walisikia ubashiri huu, ya kwamba ifikapo Januari 1, imebashiriwa ya kwamba Marekani na Urusi zote zitakuwa mavumbi ya volkeno? Hilo tu ndilo tunalohitaji. Wakati umeenda kuliko tunavyofikiria. Mnaona? Kwa hiyo, kama tumekaribia sana mpaka hata watu wa dunia hii wanabashiri jambo hili kubwa kutukia, afadhali tuwe macho, kila kitu kiwe sawa kabisa, toba zote zifanywe, kila kitu kiwe tayari, maana hatujui ni wakati gani Bwana wetu atakapotuita. Na wakati atakapotuita, "Njoni huku juu,"

afadhali uwe tayari. Na jambo hilo litatukia katika saa usiyowazia.

30 Ule ufufuo mkuu wa Kipentekoste sasa unaisha. Tunauona kila mahali, ule hatua kuu ya mwisho. Ujumbe umetoka. Kila kitu kiko tayari sasa, kikingojea. Kanisa limefungwa lakiri. Waovu wanatenda maovu zaidi. Mkanisa yanazidi kuwa baridi. Watakatifu wanamkaribia Mungu. Karama za Roho zinaanza kuongezeka katika makundi madogo. Tuko katika wakati wa mwisho. Loo, naupenda ule wimbo tuliokuwa tukiimba kanisani.

Ninatazamia kule kuja kwa ile Siku ya furaha ya ule utawala wa miaka elfu,  
Wakati Bwana wetu mbarikiwa atakapokuja kumchukua Bibi-arusi Wake anayengoja;  
Loo, moyo wangu unalia, ukiona kiu kwa ajili ya siku hiyo ya kufunguliwa kutamu,  
Wakati Mwokozi wetu atakaporudi duniani tena.

31 Tunangojea saa hiyo! Sasa, katika sura za 5 na aya ya 5, tunaona, katika somo letu lililopita, ya kwamba tulizungumzia juu ya yule Mkombozi aliye Jamaa ya Karibu, ambaye tuliona ya kwamba alikuwa ni Kristo. Alioneshwa kwa mfano na Ruthu; Ruthu akiamua; Ruthu akitumika; Ruthu akipumzika. Kuamua, kulikuwa ni kuhesabiwa haki; kutumika, akijitayarisha, kutakaswa; kupumzika, ilikuwa ni kuwa na Roho Mtakatifu, mpaka itakapokuja ile Karamu ya Arusi. Ni jambo zuri iliyoje!

Kanisa lilikuja kupitia kwa John Wesley, kuhesabiwa haki, ama... Martin Luther, kuhesabiwa haki; kupitia kwa John Wesley, kutakaswa; kupitia kwa Pentekoste, ubatizo wa Roho Mtakatifu; na sasa, linapumzika, likingojea Kuja kwa Bwana Wake. Kikamilifu!

Mkombozi wa Jamaa yetu, wale wazee walikuwa sahihi walipomwita Yeye Mwana-Kondoo, aliyekuwa karibu kuwa Simba, kama hakimu. Yeye alikuwa Mwana-Kondoo, mwajua, akiwa na kile Kitabu kilichotiwa mihuri saba. Wakati Kitabu hicho kilipochukuliwa, kazi ya upatanisho ilikuwa imekwisha.

32 Sasa, katika sura ya 3, Kanisa lilikuwa limenyakuliwa, lakini sasa ukombozi hauna budi kufunuliwa, jinsi Kanisa lilivyokombo—kombolewa, ufunuo wa yale yaliyotukia katika wakati wa Kanisa. Mnaona, Kanisa limeondoka, kwa hiyo Yeye sasa anaonyesha, katika sura ya 5, jinsi vile alivyotimiza jambo hilo, yale yaliyotokea, jinsi alivyolitia Kanisa muhuri. Ufunuo wa Jina Lake; ubatizo wa maji, kwa kutumia Jina Lake; Uzima wa Milele; hakuna kuzimu ya Milele; uzao wa nyoka; usalama wa Milele; mafundisho yote muhimu, kuchaguliwa tangu zamani, kwa Kanisa, ambako kulifunuliwa kwa Kanisa. Yeye anaonesha jinsi alivyofanya jambo hilo.

33 Sasa, Mtu wa Jamaa yetu anapewa Kitabu kilichotiwa mihuri saba cha Ukombozi kutoka kwa Mwenyewe wa asili. Amina! Ni nani aliyekuwa, tunaona, aliyekuwa Mmiliki wa asili? Mungu Mwenyewe. "Naye Mwana-Kondoo akaja akakitwaa kile Kitabu kutoka katika mkono wa kuume wa Yeye aliyeketi juu ya kile Kiti cha Enzi." Mwana-Kondoo alikuwa nani? Mkombozi, Mkombozi wetu wa Jamaa ya Karibu, Jamaa wa Karibu kwa Kanisa, Ambaye alikuja na kuwakomboa Israeli.

Sasa tutaingilia jambo hilo asubuhi ya leo. Israeli walikombolewa, lakini huo haukuwahusu wao, maana walimkataa Yeye. Lakini, Kanisa lilipokea ukombozi wao, Naye ni Mkombozi wa Jamaa yetu. Kama vile Boazi alivyokuwa amemkomboa Naomi, kusudi ampate Ruthu, yule Mmoabu, mgeni, Mmataifa; vivyo hivyo Kristo aliwakomboa Israeli, akafanya ukombozi, na akakataliwa.

34 Mnakumbuka ule msamaha, ambapo huyo mtu alipigwa risasi, ambao ninasimulia wakati mwingine? Wakati wa vita vya wenyewe kwa wenyewe, wakati ... Alikuwa ni mtu mzuri. Yeye hakuwa na hatia, nao wakampata na hatia. Ingawaje, alikuwa na hatia kwa namna fulani, kwamba alitoroka wakati wa vita. Nao wakampata na hatia na walikuwa wanataka kumpiga risasi. Na mtu fulani alimwendea Rais Lincoln na kusema, "Bw. Lincoln, huyu ni mtu Mkristo. Aliogopa. Mvulana huyu, ninawajua ndugu zake. Yeye aliogopa tu. Hakutaka kufanya madhara yo yote. Alitoroka." Kasema, "Bw. Lincoln, liko mikononi mwako. Wewe ndiwe tu unayeweza kumsamehe."

Bw. Lincoln akatwaa kipande cha karatasi na kalamu yake, na kutia sahihi, "Amesahehewa," huyu *Fulani*. "Abraham Lincoln."

Akakimbia gerezani, na akasema, "Hili hapa. Nimepata msamaha wako."

35 Naye mtu huyo akasema, "Nakataa kuuangalia. Ingekuwa na muhuri mkubwa juu yake. Ungekuwa na kila kitu. Unajaribu tu kunifanyia mzaha. Siyo Abraham Lincoln. Mtu ye yote angeweza kutia sahihi jina lake. Lakini ungepaswa kuidhinishwa kwa muhuri wake, na kadhalika, kama unatoka kwake." Na mtu huyo akamshawishi; ingawa mtu huyo aliyekuwa gerezani alifikiri yeye alikuwa anacheza, akaondoka tu akaenda zake.

Kesho yake asubuhi, alipigwa risasi. Na basi baada ya kupigwa risasi, basi kulikuweco na kesi ya mahakama kuu, kwa sababu Abraham Lincoln, masaa ishirini na manne kabla mtu huyo hajapigwa risasi, alikuwa ametia sahihi jina lake ya kwamba mtu huyu amesamehewa. Na ndipo serikali ikampiga risasi, hata hivyo. Vipi basi? Basi mahakama kuu ya Marekani, ikasema, ikafikia uamuzi huu kwa ajili ya mahakama Kuu, ikasema, "Msamaha si msamaha isipokuwa upokelewe kama msamaha."

36 Naye Yesu aliwakomboa Israeli pale Kalvari. Lakini haukuwa ni msamaha kwao, kwa sababu hawakuupokea kama msamaha. Lakini, katika somo letu sasa juu ya majuma haya sabini, tunaona wanarudi na kupokea msamaha wao. Lakini, Yeye alilikomboa Kanisa, basi tumesamehewa kwa sababu tumepokea Damu ya Yesu Kristo kama msamaha wetu.

37 Sasa, tunaona ya kwamba Yeye alikuwa Mkombozi wa Jamaa yetu, Naye alikitwaa kile Kitabu kutoka kwenye mkono wa Mwenyewe wa asili. Ni hati ya kumiliki ukombozi. Tuliona jambo hilo. Mnakumbuka lile somo? Ni hati-miliki ya ukombozi. Ni hati ya siri inayoambatanishwa nayo, ya kwamba Mungu alihitaji uhai kwa mauti, katika bustani ya Edeni. Ndipo, Yesu, Yule mwenye haki, akafa na kuitwaa hiyo hati-miliki, naye akaweza kuvunja ile Mihuri, akafunua yale yaliyokuwa ndani Yake; na akatoa urithi, ambao ulikuwa ni mali Yake, kwa watu Wake. Uzima wa Milele, aliourithi kwa kufanya jambo hilo, Yeye aliorudisha Uzima Wake Mwenyewe, pale Kalvari, na kuugawanya kati yetu kwa Roho Mtakatifu. Amina! Hakuna mtu aliyepata (kamwe) kuja hata kuwazia juu ya upendo huo uliokuwako, yale aliyotenda Yeye!

Shetani, aliyekuwa zamani ndiye yule anayemiliki kwa sababu ya lile anguko katika bustani, anafungwa na kutupwa katika Ziwa la Moto. Siku Zake zimekwisha.

38 Yesu, katika Injili, alikuwa na vyeo vinne. Tulipata jambo hilo. Mwana wa Daudi, mrithi kwenye Kiti cha Enzi; Mwana wa Ibrahimu, cheo cha kifalme; Mwana wa adamu, mrithi wa dunia; Mwana wa Mungu, mrithi wa mambo yote. Cheo cha kifalme!

Katika Agano la Kale, mali isingeweza kushikiliwa zaidi ya miaka hamsini. Isingeweza kuondolewa kutoka kwa mmiliki wake wa asili ila miaka hamsini. Na katika siku ya arobaini Yeye alilipia gharama. Kwenye siku ya hamsini, ule ukombozi na zile nguvu zilizokuwa mali ya Kanisa, zilizopotea kwenye bustani ya Edeni, zilikombolewa na zikarudishwa, na kutumwa kwetu kwa ubatizo wa Roho Mtakatifu, katika siku ya hamsini.

39 Ndipo tukachukua hili, lile gombo. Tulichukua yale magombo, jinsi ambavyo alikabidhiwa gombo hili mkononi Mwake. Jinsi ambavyo Yeremia, katika Yeremia 32:6, binamu Yake, Hanameli, alivyoachiwa urithi. Nao walikuwa wakienda uhamishoni. Ambako, tunaenda, pamoja naye, asubuhi ya leo, uhamishoni. Nayo iliwekwa katika chombo cha udongo; inaonesha mahali ambapo nguvu za Mungu, na yale magombo pamoja na siri za Mungu, zinajulikana, moyoni. Mpango wetu wa ukombozi, nao vile vile umewekwa katika vyombo vya udongo, Jina la Yesu na ufunuo.

40 Tunaona ya kwamba hiki kilikuwa kimetiwa Mihuri Saba, na kila Muhuri ulikuwa umefungwa kukizunguka. Na ufunuo unapokuja, Yeye alivuta Muhuri, akaufungua huu na kusoma yale Muhuri huo uliyosema. Kisha akafungua huo mwingine, lile gombo, na kusoma uliyosema Muhuri huo. Akaufungua huo uliofuata, akautoa na kuona yale Muhuri huo uliyosema, na kwamba ufunuo ulikuwa ni nini. Hivyo ndivyo hasa vile Mihuri yetu Saba, tutakayoingilia karibuni, tunatumaini, itakawa hivyo. Kila Muhuri, wakati unapoondolewa kwenye kile Kitabu, utafunguliwa, nao utaonyesha yale hasa yaliyotukia.

Tunaona ya kwamba kuna "saba," tano katika mpango wa ukombozi. Tano ndiyo namba hiyo. Na kuna saba tano; Mihuri Saba, Roho Saba, malaika saba, Baragumu Saba, na nyakati saba za kanisa. Kwa hiyo, mnaona, hizo saba tano ni neema. Tano ni neema, na saba ni ukamilifu. Kwa hiyo inakubaliana kikamilifu tu kabisa, mnaona. Vema.

41 Kama vile, kila Muhuri unaovunjwa katika Neno la Mungu, unamfunulia huyo mtu wa wakati huo, ni wakati gani tunaishi, roho ya wakati huo, kanisa la wakati huo. Ufunuo 10, mwishoni, tunaona wakati ule Muhuri wa mwisho ulipovunjwa, tunamwona yule Malaika amesimama ameweka mguu mmoja juu ya nchi, na huo mwingine juu ya bahari, ameinua mkono Wake kuelekea Mbinguni, na upinde wa mvua juu ya kichwa Chake, akiapa kwa Yeye aliye hai milele na milele, ya kwamba wakati umekwisha, wakati ule Muhuri wa mwisho. Nanyi ngojeni mpaka tutakapoifikia ule Mihuri na kuona mahali huo Muhuri ulipo.

Baada ya kupata yale majuma sabini, halafu tutaona mahali ilipo ile Mihuri, "Wakati umekwisha," ukombozi umekwisha, Yeye sasa ni Simba na Hakim. Yeye ni Mwokozi wako asubuhi ya leo, lakini siku moja atakuwa Hakim wako.

42 Ya 8 hadi ya 1...aya ya 14 ya sura ya 5, inafunua wakati wa kuabudiwa kwa Mwana-Kondoo, Mbinguni na duniani pia; kile Kitabu kilichotiwa Muhuri saba, yule Mwana-Kondoo aliyestahili, Mkombozi wa Jamaa. Na kutoka aya ya 8, hadi ya 14, Malaika wanamwabudu Yeye, wazee wanamwabudu, wale Wenye Uhai wanamwabudu. Na Yohana akamwabudu sana hata akasema, "Kila kiumbe Mbinguni, duniani, chini ya nchi, kilisia nikisema, 'Baraka, utukufu, nguvu, hekima, ina Mwana-Kondoo.'" Ni wakati wa kumwabudu yule Mfalme Mwana-Kondoo. Sasa, Kanisa limeondoka, kumbukeni.

43 Sasa hebu na tufungue Danieli, na mlango wa 9, na aya ya 1 hadi ya 3. Na halafu tutachukua ya 20 hadi ya 27, kwa sababu haya ni maombi ya Danieli tu. Ninawatakeni msome hili tena na tena, katika juma hili, sasa, mpaka mtakapolipata.

*Katika mwaka wa kwanza wa Dario, mwana wa...wa uzao wa Wamedi, aliyetawazwa*

*kuwa mfalme juu ya ya milki ya Wakaldayo;*

*Katika mwaka wa kwanza wa kumiliki kwake, mimi Danieli,...-fahamu, nilifahamu kwa kuvisoma vitabu, nilifahamu hesabu...miaka, ambayo neno la BWANA lilimjia Yerima nabii, ya kuutimiza ukiwa wa Yerusalemu, yaani, miaka sabini.*

*Sasa (inayofuata) Nikamwelekezea Bwana Mungu uso wangu, ili kutaka kwa maombi, na dua, pamoja na kufunga, na kuvaa nguo za magunia na majivu.*

*... Nikamwomba BWANA, Mungu...nikaungama,...*

44 Na anazidi kuendelea mbele, mpaka sasa tunafikia aya ya 20. Ili kuokoa wakati, watu wakiwa wamesimama, ninataka mfikie kwenye aya ya 20, mpaka tutakapofikia sasa kwenye—kwenye aya ya 20.

*Basi hapo nilipokuwa nikisema, na kuomba, na kuiungama dhambi yangu, na dhambi ya watu wangu Israeli, na kuomba dua yangu mbele za BWANA, Mungu wangu, kwa ajili ya mlima mtakatifu wa Mungu wangu;*

*Naam, nilipokuwa nikinena katika kuomba, mtu yule, Gabrieli, niliyemwona katika njozi hapo kwanza, akaanza,...akirushwa upesi, alinigusa panapo wakati wa dhabihu ya jioni.*

*Akaniagiza, akaongea nami, akasema, Ee Danieli, nimetokea sasa, ili nikupe akili upate kufahamu.*

Laiti tungalikuwa pale! Yeye alimkuta akiwa vipi? Katika maombi. Yule Malaika, "yule mtu." Mnaona, alimwita Yeye, "mtu yule." Na akiwa wa...

*Mwanzo wa maombi yangu ilitolewa amri, (naye akaja ili apate kwenda) nami nimekuja kukupasha habari; maana wewe unapendwa sana; kama...basi itafakari habari hii, na kuyafahamu maono haya.*

*Muda wa majuma sabini umeamriwa juu ya watu wako, na juu ya mji wako mtakatifu, ama mji wako, ili kukomesha makosa,...kuishiliza dhambi, na kufanya upatanisho kwa ajili ya uovu, na kuleta haki ya milele, na kutia muhuri maono na unabii, na kumtia mafuta yeye aliye Mtakatifu.*

Hizo hapo sababu sita za kuja Kwake. Sasa angalia.

*Sasa, basi ujue na kufahamu, (sasa sikiliza) ya kuwa tangu kuwekwa amri ya kutengeneza na kuujenga upya Yerusalemu hata...Masihi aliye mkuu; kutakuwa na majuma saba;...katika majuma sitini na mawili utajengwa tena pamoja na njia kuu zake na handaki, naam, katika wakati wa taabu.*

*...baada ya yale majuma sitini na mawili, Masihi atakatiliwa mbali, lakini si kwa ajili yake mwenyewe: na watu wa mkuu atakayekuja—mkuu atakayekuja, wataungamiza mji, na patakatifu; na mwisho wake utakuwa pamoja na gharika,...na hata mwisho ule vita vitakuwako; ukiwa umekwisha kukusudiwa.*

*Naye atafanya agano thabiti (sikilizeni) na watu wengi kwa muda wa juma moja; moja la haya majuma sabini: na kwa nusu juma hiyo atakomesha sadaka na dhabihu; na mahali pake litasimama chukizo la uharibifu; na hivyo, hata ukomo, na ghadhabu iliyokusudiwa imemwagwa juu yake mwenye kuharibu.*

45 Sasa, hilo hapo somo letu kwa ajili ya mikutano mingine mitatu, minne, mitano ijayo, chochote Bwana atakachofunua. "Majuma sabini."

Sasa, nitamwomba Dok, kama akiweza, usiku wa leo, kuweka ubao wangu pale, ili kwamba nitaweza kuyachora. Sitaki mlikose. Sasa inakubidi kusoma pamoja nami, na kusoma kwa kina, la sivyo utalikosa. Nami ninataka kuyachora hapa kwenye ubao, halafu nanyi mlete penseli zenu na karatasi na mwandike tarehe hizi, nyakati hizi, na mambo yote kuhusu jambo hilo.

Sasa, yale majuma sabini yanaanza (sasa shikeni jambo hili) baada ya kanisa kuondolewa. Sasa, kila mtu anayelielewa jambo hilo, aseme, "Amina." [Kusanyiko linasema, "Amina." - Mh.] Sasa, baada ya Kanisa kuondolewa.

46 Ufunuo 6:1, mpaka Ufunuo 19:21, inahusika na yale majuma sabini, kwa hiyo hatuna budi kusimama na kuelezea, kabla hatujaendelea mbele zaidi. Hatuna budi kusimama na kueleza ni kwa nini majuma haya sabini. Maana, kama hatuyaelezei, Mihuri itawapita, mtapitwa na hizo Baragumu, mtapitwa na hivyo Vitasa, hayo Mapigo, hizo roho chafu kama chura, hizo Ole tatu, kule kutupwa kwa lile joka jekundu, yule mwanamke katika jua. Mtayakosa yote, msipoyafahamu, maana yanatendeka papa hapa katika juma hili la sabini. Hapo ndipo yanapotukia.



47 Sasa, nabii Danieli alikuwa Babeli kwa miaka sitini na minane. Ninyi ambao mnataka kurudisha marejeo, na kujiokolea wakati kidogo, jambo ambalo ilinibidi ku—kulitafuta. Miaka sitini na minane! Yeye alienda uhamishoni katika 606 K.K., na wakati hilo ono lilipomtokea ilikuwa ni—ni 538 K.K. ukitoa 538 kutoka 606, inabakia sitini na minane. Alikuwa Babeli miaka sitini na minane, miongoni mwa makafiri, na hata hivyo alipata ushindi. Amina. Hatuwezi kukaa hata saa moja.

Lakini yeye alikuwa katikati kabisa, bila mtu mwingine ye yote isipokuwa wenzake watatu, na hao walikuwa katika sehemu mbalimbali za ule ufalme. Lakini, Danieli, akisimama peke yake na Mungu, alidumisha ushindi kwa muda wa miaka sitini na minane. Wazia jambo hilo! Sitaki kuanza kuhubiri, kwa sababu huu unapaswa kuwa ni Ujumbe wa mafundisho. Lakini, kwa muda wa miaka sitini na minane, yeye alikuwa amedumisha ushindi wala hakuwa ametiwa unajisi, mbele ya Mungu; bila ubatizo wa Roho Mtakatifu, bila Damu ya Yesu Kristo kumfanyia upatanisho; akiwa na damu ya mafahali tu, na mbuzi, na mitamba, ambayo ilimbidi kuwatoa sadaka kwa siri, kwa sababu ya desturi za makafiri wa nchi ile. Walikuwa wamepelekwa kule chini. Yeremia aliwatabiria, ya kwamba walikuwa wanaenda huko.

48 Sasa, Danieli, loo, jamani, alikuwa ameanza kuona ya kwamba wakati ulikuwa unakaribia, kama vile tu tulivyo leo. Danieli alianza “kufahamu,” akasema, “kwa kusoma vitabu.”

*Katika mwaka wa kwanza wa kumiliki kwake,...Danieli,...katika kumiliki kwake, mimi Danieli, nilifahamu kwa kuvisoma vitabu, nilifahamu hesabu ya miaka, kwa hiyo...neni la BWANA lilimjia Yeremia nabii, ya kutimizwa miaka sabini katika...ukiwa wa Yerusalemu.*

Yeremia, katika 606 K.K., alitabiri, kwa sababu ya dhambi zao na ukafiri, ya kwamba wangukuwa huko miaka sabini.

49 Mnakumbuka, kulikuweko na nabii mwingine aliyejitokeza siku hiyo. Siwezi kukumbuka jina lake kwa wakati huu. Huenda nikaweza kulikumbuka kwa ajili yenu mnamo—mnamo dakika chache, kama ningerejea nyuma kidogo. Lakini yeye alikuja na kusema, “Yeremia, umekosea. Mungu atawaweka Israeli kule kwa siku kadha tu, kwa ninii kadha, kama miaka miwili.”

Yeremia alisema, “Na iwe hivyo. Amina.” Akasema, “Lakini ngoja kidogo. Hebu na mimi na wewe tuchunguzane, kama manabii.” Yeye alisema, “Kumbukeni, kumekuwako na wale waliotabiri kabla yetu, nao walisema mambo yaliyokuwa mabaya. Naye Mungu aliwashughulikia kwa kusema mambo mabaya. Kwa hiyo, hebu na tuwe na hakika. Lakini Bwana Mungu ameniambia kuna miaka sabini bado.”

Mungu alimpiga nabii huyu wa uongo, na akachukua uhai wake mwaka uo huo, kwa sababu Mungu alikuwa amemwambia nabii huyu wa kweli ya kwamba kulikuwa na miaka sabini.

50 Nami nawatakeni mwone vile Danieli, ingawa alikuwa ni mgeni, ingawa alikuwa ameondolewa kwa watu wake, ameondolewa kanisani mwake, bila ya ibada hata moja ya kanisa, bila kanisa lo lote la kuhudhuria, bila nyimbo zo zote za kuimbwa ila zile alizoimba mwenyewe, katikati ya mambo haya yote, angali alishikilia yale aliyosema nabii yule. Amina! Amina!

Hakuna kanisa la kwenda, hakuna mtu wa kushirikiana naye; kila mtu alienda kwenye mahekalu ya makafiri, kila mtu aliabudu sanamu zao. Hakuna nyimbo za Kikristo; hakuna mtu aliyeamini jambo lile lile aliloamini. Na katika miaka sitini na minane, tangu alipokuwa mvulana mdogo wa kama umri miaka kumi na miwili, kumi na minne, wakati alipochukuliwa akapelekwa kule, yeye alidumu kuwa mwaminifu kwa Mungu; na akafahamu kwa nabii Yeremia ya kwamba siku zilikuwa karibu kutimia.

Jinsi vile jambo hilo lingeutahadharisha moyo wa nabii ye yote wa kweli wa Mungu leo, kwamba tuangalie nyuma tuone yale nabii huyu wa kweli aliyosema, na tujue ya kwamba tuko katika wakati wa mwisho.

Akasema, “Nilifahamu kwa kuvisoma vitabu ya kwamba Yeremia, ndugu yangu, miaka mingi, mingi iliyopita, alitabiri ya kwamba Israeli wangukuwa huko kwa muda wa miaka sabini. Na wakati huo uko karibu kutimia.” Ndipo akajitayarisha. Akafunga, na kujitakasa, na wakati aliponinii...majivu na nguo za magunia, na kuyaweka kichwani mwake, naye akaingia kwenye kufunga na kuomba, apate kufahamu kwamba ni siku gani walikuwa wanaishi.

51 Na kama Danieli, nabii wa Bwana, aliweza kuvichunguza vitabu vya Yeremia, na vikamfikisha mahali kama hapo; ya kwamba hata kule kutoka kwa Israeli, wote wakiwa hai, walikuwa wanatoka Babeli, kwenda kwenye nchi ya uenyaji wao, kungemfanya kufunga kwa nguo za magunia na majivu. Ni zaidi sana vipi inavyolipasa Kanisa la Mungu aliye hai kufanya hivyo, kujua ya kwamba wakati unaisha na hautakuweko tena; na kule Kuja kwa Bwana Yesu Kristo, na ule Utawala mkuu wa Miaka Elfu uko tayari kuanza! Tunawezaje kupitisha wakati bure, kucheza kamari, kwenye vidimbwi vya kuogelea Jumapili, hatuna wakati kwa ajili ya Bwana? Kwenda tu huko... Kama mchungaji akisema kitu juu ya jambo fulani ama lingine ambalo mtu hupendi, unaamka na kutoka. Na kama ninii—kama kanisa likichukua muda mrefu sana, mbona, wewe—wewe, una—unachukua. Angalia hali yetu. Angalia kile tunachofanya.

Linganisha maisha yetu na nabii huyo. Mtu mmoja, katika ufalme mkamilifu, asiye na kanisa la kwenda, wala hakuna mahali pengine pa kwenda. Yalikuwa yamebomolewa na kuchomwa moto; mji wake, watu wake walikuwa mateka. Miaka sitini na minane! Sitini na minane, sitini na tisa, sabini; alikuwa na miaka miwili iliyosalia. Kwa hiyo alipoanza kusoma katika kitabu na kuona ya kwamba wakati ulikuwa unakaribia kutimia, kutimizwa, alimwendea Mungu katika maombi, apate kujua jambo hilo.

52 Ni wakati ulioje! Tunafanya nini? Wakati, "Mataifa yanavunjika; bahari inavuma; mioyo ya watu inavunjika kwa hofu; mshangao wa wakati." Mambo haya yote, maandishi kwenye ukuta. Ubaguzi wa rangi; kila namna ya maovu yanaendelea ulimwenguni; na kuzozana, na kupigana, na ghasia. Na zana za vita zikining'inia kwenye mabanda, ambapo taifa moja dogo ukubwa wa Cuba hapa chini linaweza kuuangamiza ulimwengu katika dakika kumi. Nao wakizozana mmoja kwa mwingine, makafiri wasiomjua Mungu wala hawazijui nguvu Zake.

Na Roho Mtakatifu Kanisani, akitenda kazi kati ya Walioteuliwa, akijionyesha kwamba Yeye yu hai baada ya muda wa miaka elfu mbili, ya kwamba ni yeye yule jana, leo, na hata milele. Tunawezaje kuketi kivivu? Tunawezaje kulivuka jambo hilo vivi hivi? Wakati umewadia wa kujiweka sawa, tukiitazamia ile saa kuu inayokuja.

53 Sasa, yeye alisoma katika Yeremia, sura ya 25. Hebu na tufungue katika Yeremia, mlango wa 25, na tusome yale Yeremia aliyosema. Kwa kweli, hebu tuanzia kwenye kifungu cha 8, maana ni ... Ninawatakeni mwe na hakika ya kupata jambo hilo. Aya ya 11 ndipo nilipokuwa nimeandika hapa chini nipate kusoma, lakini hebu na tuanzia kwenye aya ya 8.

*Kwa sababu hiyo BWANA wa majeshi asema hivi; ...*

Ninapenda tu jambo hilo. Ninapoweza kumsikia nabii akisimama na BWANA ASEMA HIVI, ndugu, hivyo ndivyo ilivyo. Kwangu mimi, hilo latosha. Ni hayo tu.

*...BWANA wa majeshi asema hivi; Kwa kuwa hamkuyasikiliza maneno yangu,*

*Angalieni, nitapeleka watu na kuzitwaa jamaa zote za upande wa kaskazini, asema BWANA, nami nitatuma ujumbe kwa Nebukadreza, mfalme wa Babeli, mtumishi wangu, nami nitawaleta tena...juu ya nchi hii, na juu yao wakao ndani yake, na juu ya mataifa haya yote yaliyopo pande zote; nami nitawaangamiza kabisa...*

Kumbuka, hao walikuwa wateule wa Mungu ambao Yeye anazungumza habari zao. Hao hawakuwa makafiri. Hao walikuwa ni wafuasi wa kanisa.

*Tena, nitawaondolea sauti ya kicheko,...na sauti ya furaha, (kama tulivyo nayo leo, rumba zote, Ricky na Elvis,) na, lo, sauti ya bwana arusi,...sauti ya ndege...ama, bibi-arusi, hasa, sauti ya jiwe la kusagia,...na nuru ya mishumaa.*

*Na nchi hii yote itakuwa ukiwa, ...*

Msikie nabii huyo akilia kwa sauti kuu, "Nchi hii yote itakuwa ukiwa!" Wala si kumwiga mtumishi huyu mkuu wa Mungu, lakini ninatabiri ya kwamba taifa hili lote litakuwa ukiwa. Mungu ataliadhibu taifa hili kwa ajili ya dhambi zake. Kama Mungu hangewaacha israeli, wateule Wake, Uzao wa Ibrahimu, ambao alifanya agano na ahadi nao, kama Yeye hangewaachilia kwa kufanya uovu; ingawa walikuwa wanadini kweli kweli moyoni, walikuwa na makanisa makubwa, na makuhani, na waalimu; lakini kwa sababu ya uzinzi na kadhalika miongoni mwao, na Mungu akawafanya wavune waliyopanda, vivyo hivyo na sisi tutajuta pia. Kifungu cha 11:

*...nchi hii yote itakuwa ukiwa, na ... kitu cha kushangaza; ...*

Hiyo ni kusema, kila mtu ataangalia tu na kusema, "Hao hapo. Walikuwa wakuu sana. Waangalie sasa."

*...nayo mataifa haya watamtumikia mfalme wa Babeli miaka sabini.*

Huo ni muda wote wa maisha. Hapo ndipo wakati mama yako mzee, mama mzee mbarikiwa alipokuwa mtoto mchanga. Walikuwa kule bila Mungu, bila kanisa, bila wimbo, bila cho chote kile, kwa kizazi kizima, mpaka kizazi hicho chote chenye kutenda dhambi kilipokufa.

*Na itakuwa miaka hiyo sabini itakapotimia, kwamba nitamwadhibu mfalme wa Babeli, na taifa lile, asema BWANA, kwa sababu ya uovu wao, nayo nchi ya Wakaldayo pia; nami nitaifanya kuwa ukiwa wa milele.*

*Nami nitaleta juu ya nchi ile maneno yangu yote niliyoyanena juu yake, naam, yote yaliyoandikwa ndani ya kitabu hiki, aliyotabiri Yeremia juu ya taifa lote.*

*Kwa maana mataifa mengi na wafalme wakuu watawatumikisha—watawatumikisha;*

*naam, hao pia; nami nitawalipa...kwa kadiri ya matendo yao, na kwa kadiri ya maneno ya mikono yao.*

*Maana BWANA, Mungu wa Israeli, aniambia hivi, Pokea kikombe cha divai ya ghadhabu hii mkononi mwangu, ukawanyweshe mataifa yote, ambao nitakupeleka kwao.*

Kwa maneno mengine, "Yeremia, nimekupa ujumbe huu. Usiketi kimya. Usikae mahali pamoja, lakini watabirie mataifa yote." Mnalifuata? [Kusanyiko linasema, "Amina."—Mh.] "Tabiri kwa taifa lote. Onesha ishara Zangu na maajabu, na uwafanye wajue ya kwamba Mimi ninakuja kufanya jambo hili."

*Nao watakunywa, na kulewa-lewa, na kufanya wazimu, kwa sababu ya upanga nitakoupeleka kati yao.*

54 Wao wanafanya nini katika siku hii hii? Wanakuita na—nabii wa uongo, wanakuita mwe—mwenye kupatana, wanakuita m—mshupavu wa dini, mpiga ramli, ama mwotaji wa ndoto, ama namna fulani ya mwenye kushirikishana mawazo. "Watakuwa wazimu!" Na neno wazimu, kama utalivunja-vunja, linamaanisha "kichaa." "Kwa kweli wataingia kichaa, na, kusema, 'A-ha, msimjali huyo mtakatifu anayejifingirisha, huo upuuzi,' kwa sababu ya Neno nitakalowapeleka."

55 Mnaona historia ikijirudia? Yeremia hangekubaliana na Mafarisayo wao, Masadukayo, Maherodia, wo wote wale. Yeye, yeye alilitoa tu Neno, nalo likawafanya wamkasirikie sana. Ni kitu gani? Sasa angalia.

*Ndipo nikakipokea kikombe kile mkononi mwa BWANA, nikawanywesha mataifa yote,...*

Yeremia hakukaa nyumbani. Yeremia hakukaa tu katika mahali pamoja, lakini aliwanywesha mataifa yote.

*...ambao BWANA alinipeleka kwao;*

56 Yeremia alilichukua Neno la Bwana, divai ya Neno Lake. Na divai ni nguvu za Neno Lake. Divai ina nguvu. Divai ni kileo. Divai ina nguvu nyuma yake. "Nami mimelichukua Neno la Bwana," kasema Yeremia, "na kulidhihirisha. Divai, zile nguvu zilizo ndani Yake, nilizithibitisha mbele zao, wala hawangesikia Hilo."

Mungu akasema, "Basi nitawapeleka Babeli kwa muda wa miaka sabini." Hivyo ndivyo alivyofanya hasa. Wenye haki na wasio haki walienda, wote pamoja.

57 Sasa, turudi kwenye lile somo. Danieli alikuwa akisoma. Wazia tu, Danieli alisoma maneno yale yale tunayosoma asubuhi ya leo. Danieli alisoma Biblia ile ile, vituo vile vile, sentensi zile zile, mambo yale yale ambayo mimi ninaamini, kwa neema ya Mungu, nitawasomea katika Jumbe chache zifuatazo, jambo lile lile, kuwaonyesha ya kwamba tuko katika wakati wa mwisho.

Naye Danieli, akilichukua Neno kutoka kwa Yeremia, anashuka anaenda kule Babeli. Naye alikuwa ni nabii aliyetiwa mafuta. Ndipo akafanya miujiza, ishara, aliweza kufasiri lugha zisizojulikana, na kufanya ishara na maajabu miongoni mwao. Hata hivyo, akisimama peke yake, peke yake! Amina! Alisimama peke yake.

58 Lakini Yeremia alikuwa ameandika Maneno haya miaka mingi, mingi sana hapo kabla. Naye Danieli, akilifasiri Neno, alipata ... "Aisee, sasa ngoja kidogo. Tunakaribia wakati wa mwisho, kwa kuwa tayari nimekuwa hapa chini miaka sitini na minane. Na nabii wa Bwana," amina, "ndugu yangu, nabii wa kweli wa Mungu aliyejithibitisha mwenyewe kuwa nabii, alitabiri kwetu. Nimeliandika hapa katika kitabu, kilichosema, 'Itatimizwa miaka sabini.' Ee Bwana Mungu, tunakaribia mwisho. Kizazi hicho chote kimekufa. Utafanya nini sasa, Bwana? Uliahidi kututumia ..." Naye akajiandaa, kusudi apate kuomba.

59 Ee Mungu, kama kuliwahi kuwa na wakati ambapo tunapaswa kujiweka tayari, kuomba, ni sasa. Kwa kuwa, sisi kama mtumishi Wake wa kweli, tunaona, kwa Nyaraka za mtume, kwa maonyo ya Roho Mtakatifu, ya kwamba tuko katika siku ya mwisho. Roho Mtakatifu ananena jambo Hilo. "Katika siku za mwisho, watu watakuwa wakaidi, wenye kujivuna, wapendao anasa kuliko kumpenda Mungu, wasiotaka kufanya suluhu, wasingizaji, wasiojizua, wasiowapenda walio wema." Ninafahamu kwa Waraka.

60 Nami ninafahamu ya kwamba watakuja wenye kudhihaki, katika siku ya mwisho. Nafahamu ya kwamba taifa litakuwa litapigana na taifa, katika siku ya mwisho. Nafahamu ya kwamba kutakuweko na misukosuko ya mawimbi, katika siku ya mwisho. Ninafahamu ya kwamba kutakuweko na vitu vya kutisha, kama visahani virukavyo, mbinguni, mambo ya ajabu yasiyoelweka, na mioyo ya watu ikivunjika kwa hofu. Kutakuwa na mishangao ya wakati, na dhiki miongoni mwa watu. Ninasoma ya kwamba wote wataingia katika mashirika na madhehebu, na watakuwa na muungano, katika siku ya mwisho. Nafahamu ya kwamba wanawake watakata nywele zao katika siku ya mwisho. Nafahamu watavaa nguo fupi, na kutembea kwa viatu vyenye visigino virefu, wakiliza njuga, katika siku ya mwisho. Ninaelewa ya kwamba uadilifu utakuwa duni sana katika siku ya mwisho. Ninaelewa ya kwamba wahubiri watakuwa wachungaji wa uongo katika siku ya mwisho, ambao watapatana, na hawatawalisha watu Neno la Mungu, bali watafuata kanuni za imani na kadhalika, badala yake. Lakini nafahamu kutakuwako na Sauti itakayokuja

katika siku za mwisho, ikilia kutoka nyikani, ikiwaita watu warudi kwenye Ujumbe wa asili, warudi kwenye mambo ya Mungu. Ninaelewa, kwa Kitabu hicho, mambo hayo yatatukia.

61 Ninafahamu ya kwamba katika siku za mwisho kutakuja njaa. Makanisa yatakuwa yameunda madhehebu sana, na yamewekwa vizuri sana na kila kitu, hivi kwamba katika siku za mwisho kutakuja njaa, na haitakuwa kwa ajili ya mkate na maji tu, bali ni kwa ajili ya kusikia Neno la kweli la Mungu. Na watu wataenda kutoka mashariki, kutoka magharibi, kutoka kaskazini, na kusini, wakitafuta kusikia Neno la kweli la Mungu. Lakini makanisa yatakuwa yameunda madhehebu sana na kukazwa, hata watashindwa kuisikia. Ninaelewa hilo kwa Vitabu. Lakini, katika siku hiyo, Ee Mungu, kutakuwa na Tawi litakaloinuka kutoka kwa Daudi.

Nafahamu ya kwamba Yeye atampeleka Eliya kabla haijaja ile siku wakati wa mwisho, naye atakuwa na Ujumbe ambao utaigeuza mioyo ya watoto iwaelekee baba zao, kuwageuza kuelekea lile la asili, kurudi tena huko mwisho, na kuanza. Ninafahamu ya kwamba jambo hilo litatukia kabla tu Roho hajaliacha kanisa la Mataifa, kuwarudia Wayahudi.

62 Nami sifahamu kwa Waraka tu. Ninafahamu kwa Neno, kwa Neno lililoandikwa, ya kwamba Israeli watarudi kwenye nchi ya Uenyeji wao; nami ninamwaona akiingia.

Ninaelewa kwa Nyaraka, za manabii, ya kwamba Israeli watakuwa taifa. Wataanzisha tena kuabudu hekaluni. Mungu atanza kumshughulikia tena wakati atakapoingia katika nchi ya uenyeji wake. Loo! Manabii wawili watatokea katika siku za mwisho, pamoja nao. Ninaelewa hilo. Mara tu Kanisa la Mataifa litakapondoka, manabii wawili watawasili, Elisha na Musa, huko Israeli. Tutalipata tutakapoyapitia.

Nabii aliona wakati ulikuwa karibu kutimia kule chini huko Babeli. Vema.

63 Gabrieli anatokea, kufunua si yale tu aliyokuwa anauliza, bali kumwambia yeye yote yale yaliyokusudiwa kwa taifa la Kiyahudi, ya njiani mwote hata mwisho wa dahari. Amina! Yeye aliuliza jambo dogo, naye akapata jambo zima. Aliuliza tu apate kujua...

Danieli alikuwa anajaribu kupata habari, "Hata lini, Bwana, itachukua muda gani zaidi sasa? Yeremia nabii, mtumishi Wako, ndugu yangu, ametabiri miaka sitini na minane iliyopita, na kusema, 'kuna miaka sabini ambapo watu hawa watakaa huku. Kizazi chote cha kale kimepita sasa.'"

64 Kuna kizazi cha kale cha kipentekoste kilichoinuka, miaka arobaini iliyopita. "Wapiganaji wa kale," ndivyo walivyoitwa. Waliunda madhehebu, na kupigana, na kuzozana, njia nzima kupita Mlima Horebu na Nebo, kupitia kote kule. Lakini, hatimaye, tuko mtoni sasa. Yeye atainua kipya, pamoja na Yoshua apate kuwavusha. Torati ilishindwa; Musa aliondoka nayo; Musa alishindwa. Yoshua akawavusha. Tunaona ya kwamba madhehebu yameshindwa, lakini Roho wa Mungu... Yoshua, neno *Yoshua*, linamaanisha "Yesu Mwokozi wetu." Kwamba, Roho Mtakatifu atakuja Kanisani. Si madhehebu, bali Roho Mtakatifu ataingia miongoni mwa watu na kumfanya awe tayari kupanda, kuvuka Yordani. Ninaelewa kwa kusoma Kitabu hicho kwamba hayo ndiyo yatakayotukia. Na Mungu anajua hayo ndiyo ninayotafuta sasa, nipate kuwafariji watu Wake na kuwambia mambo yaliyo karibu kutimia, hapa asubuhi ya leo, na pia huko nje katika nchi ambako kanda hizi zitakwenda, kila mahali ulimwenguni, ya kwamba tuko katika wakati wa mwisho.

65 Yeye aliufunua wakati wote mpaka Ufalme uliporudishwa kabisa na ule Utawala wa Miaka Eflu ukaanza. Huo ulikuwa ni ujumbe wa Gabrieli. Yeye alisema, "Nimekuja kukwambia ya kwamba kuna miaka sabini, majuma sabini, bado, yaliyoamriwa juu ya watu wako, yaliyoamriwa hata mwisho wa kizazi cha Wayahudi. Kuna majuma sabini." Sasa angalia yale aliyosema. Ya kwamba sasa, tangu kuwekwa amri ya kuujenga upya...

*Muda wa majuma sabini umeamriwa juu ya watu wako, na juu ya ... mji...*

"Mji wako." Babeli haukuwa mji wake. Ambaye ... Mji wake ulikuwa wapi? Yerusalemu.

66 Sasa, wakati tutakapofikia kwenye—kwenye ninii ya saba, ama kule kuthibitishwa mara sita, tuona mji huo ni upi, na kulileta na kuthibitisha alikuwa ni nani, ni nani aliyeanzisha, mahali ulipotoka. Utadumu muda gani? Utajengwa tena? Katika wakati gani? Loo, mambo makuu yanatungojea. Vema.

*Muda wa majuma sabini umeamriwa juu ya watu wako, na juu ya...mji wako,...ili kukomesha makosa,...*

Sasa, Yeye hakusema kamwe, "Danieli ..." Hapana shaka ila alimwambia ya kwamba majuma sabini yalikuwa...ninamaanisha miaka sabini ilikuwa karibu kumalizika. Sitini na minane, ilisalia miaka miwili pekee. Nasi tunaona ya kwamba unabii wa Yeremia ulitimia kikamilifu kabisa. Miaka miwili baadaye, wakatoka. Nehemia akaenda akapata amri kutoka kwa mfalme, akaujenga ukuta katika wakati wa shida. Walifanya kazi. Alisema, "Ukuta..." Sikilizeni jambo hili.

*...ili kukomesha makosa,...kuishiliza dhambi,...*

"Kuishiliza dhambi." Kwa nani? Wayahudi. "Umeamriwa juu ya watu wako," si juu ya Mataifa. "Juu ya watu wako," Wayahudi. "Na mji wako," si New York, si Boston, Philadelphia, Chicago, Los Angeles, Rumi. Lakini, "Juu ya mji wako," Yerusalemu.

*...kasema ili kukomesha makosa,...kuishiliza dhambi,...kufanya upatanisho kwa ajili ya uovu, na kuleta haki ya milele, na kutia muhuri maono na unabii, na kumtia mafuta yeye aliye Mtakatifu sana. (Angalia!)*

*Basi ujue na kufahamu, ya kuwa tangu kuwekwa amri ya kutengeneza na kujenga upya Yerusalemu (ambao ulikuwa ndio mji wake) hata...Masihi Aliye Mkuu; kutakuwa na majuma saba(ya yale sabini), ...*

67 Ngojeni mpaka tutakapoingilia jambo hilo! Loo, jamani! Hiyo ni baraka ambayo mimi ... Nitachukua kamba nijifungie mahali hapa.

Akafunua mambo yote yajayo, kasema, "Sitakwambia tu sasa ya kwamba miaka hiyo miwili iko karibu kuninii, bali itamalizika, itatimizwa." Nasi sote tunajua ya kwamba wao walikaa kule miaka sabini kamili, kisha—kisha wakatoka, sawasawa kabisa tu na vile nabii alivyosema. Na Isaya, ama ninamaanisha ... Danieli alimwamini nabii huyo, kwa hiyo huyu hapa, tayari. Vema. Naye ...

Na sasa, Gabrieli alipokuja, Yeye alisema, "Nimekuja kukuonesha njia yote, kuwafunulia mambo haya, ya kwamba, hata kufikia mwisho." Mnaona? Angalia.

... Chukizo atalifanya ukiwa, hata ukomo, ...

68 Ukomo ni "mwisho wa mambo yote." "Nitawaonesha yale yatakayotukia." Sasa sikilizeni. Mnalipata! "Mimi ... Danieli, nimetumwa. Umependwa sana Mbinguni. Nami niliyasikia maombi yako na nimeshuka sasa kukwambia yale yaliyokusudiwa kwa ajili ya Wayahudi na Yerusalemu, tangu sasa hivi mpaka mwisho wa ukomo, jambo lote."

Sasa, mnaelewa, darasa? Kama tunaweza kujua majuma haya sabini ni nini, tunajua mwisho ni lini. Loo, jamani! Mungu na atusaidie kuyajua. Inatuambia hasa mahali fulani katika kurasa hizi, kutoka wakati ule hata wakati huu hasa, hata ukomo, wala haitakosea hata dakika moja.

69 Jinsi Neno kuu la Mungu ... Wakati Mungu alipoifanya dunia na kuiweka katika mzunguko. Nami nilikuwa nikihubiri hivi majuzi usiku, Jumapili usiku, jinsi ambavyo hakuna kitu kinachoshindwa. Mbona, dunia hii inazunguka kikamilifu kabisa hata wao wanaweza kukwambia barabara jua na mwezi vitapita lini, katika miaka ishirini kuanzia leo, hata kufikia kwenye dakika ile ile. Siwezi kuwaambia, kwa chombo cho chote cha majira saa tulicho nacho ulimwenguni; kitapoteza dakika mbili ama tatu kwa mwezi, ama kukimbia dakika mbili ama tatu, kile kizuri sana tulicho nacho. Hatuwezi kufanya kitu chochote kikamilifu. Kwa sababu, kuna jambo moja tu kamilifu, hilo ni Mungu. Na Mungu na Neno Lake ni kitu kile kile, kwa hiyo Neno la Mungu ni kamilifu.

Na kama tunaweza kuzipata siku hizi, tutapata ukomo utakuwa ni lini hasa. Mnalipata? [Kusanyiko linasema, "Amina." - Mh.] "Limeamriwa hata ukomo." Kifungu cha 24, "watu wako na mji wako mtakatifu," ambao ni Yerusalemu. Nina aya ya 21...aya ya 24 hapa. Yesu alirejea kwenye hili katika Mathayo 24.

70 Sasa, Ndugu Collins, kama yuko hapa asubuhi ya leo, sijui kama yuko au la. Katika maswali hayo usiku wa juzijuzi, aliuliza swali. (Nadhani ni sawa kwangu kusema jambo hilo, Ndugu Collins.) Juu ya "Chukizo la uharibifu, mnaona, lilimaanisha nini?"

Yesu alinena habari zake, katika Mathayo sura ya 24, nasi tunaona. Naam, Mathayo 24:15. Sasa hebu nilipate hilo upesi sana, mpate kuona nini, Yesu akinena juu ya jambo lile lile hapa, akirejea kwa Danieli. Mathayo 24:15, kwenu ninyi mnaoandika. Ninawatakeni, kila mmoja sasa, hasa usiku wa leo na—na Jumapili ijayo, waleteeni penseli na makaratasi, maana tuna ... isipokuwa mna kanda. 24, na kifungu cha 15, "Basi wakati ..."

*Basi mtakapoliona chukizo la uharibifu, lililonenwa na nabii Danieli, ...*

Wazia! Hii ni miaka mia nne na themanini na mitatu, -nne, -tano, miaka themanini na mitano kabla. Miaka mia nne na themanini na sita kabla.

*....nabii Danieli, limesimama katika patakatifu...*

Sasa angalia katika Biblia yako. Liko katika mabano.

... (asomaye na afahamu:)

71 Sasa, Yeye anazungumza na Wayahudi. Wanataka kujua, "Vipi kuhusu hekalu hili? Litabomolewa lini? Litajengwa upya lini? Itakuwa ni lini ambapo halitasalia jiwe juu ya jiwe? Itachukua muda gani?"

Akasema, "Mtakapolioana 'chukizo la uharibifu, limesimama wakati...' Danieli, 'limesimama katika patakatifu.'" Kasema, "Mtakapoona jambo hili likitimia, sasa asomaye na afahamu yale anayonena."

Hiyo ndiyo sababu tunamwomba Mungu, alifanye jambo hilo kamilifu sana, hata hakutakuweco na kivuli cha mashaka. Kwa sababu, hatupaswi kuweka tafsiri yetu kwenye mambo hayo. Halina budi kuja kupitia BWANA ASEMA HIVI. Kwa hiyo, ninaliacha papo hapo mpaka nitakapofahamu.

Akamfunulia mambo yote, lile "chukizo."

72 Na, kumbukeni, lina maana mbili, kama tu vile, "Kumwita mwanangu kutoka Misri." Kama vile Israeli walivyoitwa; vivyo hivyo na Yesu pia, Mwanawe, aliitwa atoke.

Na jambo hilo litatukia kabisa, hakika kama ninavyosimama hapa. Naye alilifanya kwa njia fulani, Naye amelificha kabisa, amelificha lote kwa Kanisa. Loo, tutakapofikia jambo hilo, kwenye huo ufahamu wenye sehemu sita, jinsi Yeye alivyoyaficha yote haya kwa Kanisa; ili kwamba Kanisa liwe likikesha kwa hilo kila dakika, halikujua lini Yeye atakapokuja. Lakini sasa wakati wa Kanisa uko karibu na kwisha, kwa hiyo uko tayari kabisa kwa kule Kuja, linajifanya tayari tu.

73 Hili ni Andiko moja lililo muhimu sana katika kile Kitabu. Linafanya nini? Linatwambia juu ya kumalizika kwa wakati wa taifa la Kiyahudi, Wayahudi. Andiko hili, majuma sabini, linafunua na kuonyesha kikamilifu tangu wakati ambao Danieli alianzia kule, mpaka mwisho wa ule ukomo. Ni moja ya vyombo vikuu sana vya saa. Ni wangapi wamenisikia nikisema, "Kama ukitaka kujua ni siku gani ya juma, angalia kwenye kalenda. Ukitaka kujua tunaishi katika wakati gani, waangalie Wayahudi"? Hiyo ni kweli. Hiyo hapo kalenda ya Mungu, iliyochukuliwa kutoka papa hapa. Mwanatheolojia ye yote, mwanachuoni ye yote wa Biblia, mtu ye yote, atakwambia ya kwamba hiki ndicho kipande cha saa, Wayahudi.

Sasa tuna wakati gani? Tunaninii tu...watu, joto, loo, mimi...

Halina uhusiano wo wote na Mataifa; hii Mihuri Saba, Mapigo Saba, Ole Saba, Baragumu Saba, hazina uhusiano wo wote. Kanisa la Mataifa litakuwa Utukufuni wakati huo. Halina uhusiano wo wote na sisi, Kanisa la Mataifa. Linawashughulikia Israeli tu. "Danieli, watu wako na Yerusalemu."

74 Sasa, na linafunua mambo ya kweli kwamba Mungu anawashughulikia Wayahudi wanapokuwa tu kwenye nchi ya uenyaji wao. Haleluya! Hapo ndipo ninapofikiri limefikia kiini chake, papo hapo.

Wao daima wanajaribu kulichukulia toka wakati ambapo Israeli walikuwepo kule katika wakati wa Danieli. Na mwandishi mmoja mashuhuri ... Maana, ninajua baadhi ya wafuasi wake wako hapa, sitasema jambo hilo. Lakini hiyo ndiyo sababu wote walikuwa na upuuzi wote huu wa uongo.

75 Je, ulijua jinsi Wamileri, kabla hawajakuwa Wasabato, walilofanya kule? Katika mwaka wa 1919, walichukua mabawa yao, (nyote mliona jambo hilo kwenye gazeti la Courier), na wakupanda hapa juu wapate kuruka waende zao, asubuhi hiyo. Hiyo ilikuwa ni kuchukua majuma sabini ya Danieli. A-ha, Mmileri. Halafu, baadaye kidogo, wakiongozwa na Bibi Elen White, ambaye alikuwa ndiye nabii wao wa kike, wakageuka na kujiita wenyewe Wasabato. Na sasa wamebadilisha jina lao likawa Sauti ya Unabii. Mnaona? Majina matatu mbalimbali ya dhehebu lile lile.

76 Sasa, lakini walikuwa wamekosea, kwa sababu walikuwa wakijaribu kuyaweka majuma hayo sabini kwa Wayahudi na Mataifa pia. Naye anasema hapa, "Ni kwa ajili ya watu wako." Wala Mungu kamwe hajamshughulikia Myahudi akiwa nje ya Palestina. Na wakati Masihi, kwenye sabini, na majuma mawili, alipokatiliwa mbali, (si kwa ajili Yake; kwa ajili yetu sisi, alipokatiliwa mbali), Israeli walitawanyika, wala (kamwe) hawajarudi kwenye nchi ya uenyaji wao mpaka katika miaka michache tu iliyopita. Kwa hiyo, wakati haukuhesabiwa mle kwa ajili ya wakati wa Kanisa. Mnalipata? [Kusanyiko linasema, "Amina." - Mh.]

Haingekuwa mwaka wa 1919. Ninaweza kuwaonesha jambo lililotukia katika mwaka wa 1919, lakini hapo ndipo wakati yule Malaika, ujumbe wa yule Malaika wa tatu ulipoanza na ile Ole ikaanza. Kweli kabisa. Lakini haikuwa ninii ... Hapo ndipo vita vilipokoma kwa njia ya ajabu sana. Tunapata jambo hilo katika sura ya 7 tutakapolifikia, tutakapoifikia sura ya 7. Nyote mmenisikia nikihubiri jambo hilo, mara nyingi, mnaona, wakati ujumbe wa Malaika huyo uliposema, "Shikilieni pepo nne za dunia hata tutakapowatia muhuri Wayahudi, watumishi." Na, sasa, waliendelea kungojea hata wakati wote wa Mataifa ulipokwisha.

Ndipo wakati Yeye aingiapo, basi—basi anawatia muhuri Wayahudi, wale mia na arobaini na nne elfu wanampokea Roho Mtakatifu. Hao hapo wale mia na arobaini na nne elfu, waliotiwa muhuri. Ufunuo 7. Mmelisoma.

"Ndipo nikaona hesabu kubwa sana iko Mbinguni tayari," Yohana aliiona, "ya jamaa yote, lugha na taifa, nao walisimama mbele za Mungu, wakiwa na mitende mikononi mwao, wamevikwa mavazi meupe, wakiimba. 'Haleluya! Amina! Utukufu, hekima, heshima, uweza, nguvu, na ziwe kwa Mungu wetu milele na

milele. Amina!' wanasema kwa sauti kuu."

77 Yohana hakuweza kufahamu wakati huo. Lakini aliangalia nyuma na akaona juu ya Mlima Sinai, (utukufu) wale mia arobaini na nne elfu ambao hawakutiwa unajisi na wanawake. Wayahudi! Wanawake, makanisa! Hawakuwa wamejiunga na madhehebu yo yote, Waluteri, Wamethodisti, Wabatisti, na Wapresbiteri. Lakini walikuwa ni Wayahudi tangu mwanzo, Othodoksi, nao walikuwa na hekalu lao pale, wakiabudu juu ya Mlima Sinai. Hao ni wale mia na arobaini na nne elfu. Hiyo ni baada ya haya; Kanisa limekwisha kwenda Utukufuni. Mnaona?

Kwa hiyo, Bw.Smith alikosea, ilibidi akosee. Maana, utaliwekaje hilo hapa chini katika mwaka wa 1919, kuwatoa wale mia na arobaini na nne elfu? Ndipo umerudi kwenye fundisho la Waruseli tena. Mnaona? Basi umerudi moja kwa moja kwenye fundisho la Waruseli, ya kwamba, "Yesu alikuja mwaka wa 1914. 1919 Yeye alitwaa Kanisa Lake. Na sasa Yeye ni mwili wa kisiri unaozunguka duniani, unafufua... unaenda kwenye kaburi la nyanya na babu, na kuwafufua wote, wote wale waliokuwa Waruseli." Upuuzi! Haileti maana katika Neno. Halitakuja sawa. La, bwana. Halitakuja sawa.

78 Lakini, Mungu ana Kweli. Na Mungu Ndiye anayeweza kuifunua na kuiweka pale ndani, na kuionesha kikamilifu, kwetu. Mnaona? Ninaamini atafanya hivyo. Sijui. Ninawaambia Kweli. Sijui, bali ninaamini. Ninaamini ya kwamba Yeye atafanya jambo hilo.

Kwa hiyo, unaona, Mungu hajawashughulikia Wayahudi. (Nawatakeni mweke jambo hili niani mwenu) mradi tu Israeli...

79 Hapo ndipo nilipojaribu kumwambia ndugu huyu anayeketi hapa, anayezungumza kuhusu kwenda Israeli, iacheni Israeli! Iacheni, ninyi watu wote mnaozungumza juu ya kuwaongoa Wayahudi. Kabla ya Ujumbe huu kumalizika, mtaona ni BWANA ASEMA HIVI, kwa Neno na kwa Roho. Israeli wataongoka wote, taifa lote, katika usiku mmoja. Biblia ilisema hivyo. Lakini Injili hata si kwa ajili yao. Kuna watoro wachache walio nje, na kadhalika namna hiyo, walioingia, na walio nje ya kundi zima la Wayahudi, walioingia na kuokolewa. Hiyo ni kweli. Ninaamini jambo hilo kwa moyo wangu—wangu wote.

Lakini, kumbukeni, mradi tu Israeli wako nje ya taifa lao, hawawezi kuokolewa. Sasa wanarudi. Nao wataokolewa, taifa lote zima, katika siku moja. Biblia ilisema hivyo. Siku moja; itawaleta, kabisa, Israeli wote wamrudie Mungu. Kutakuweko na jambo kuu mno litakaloigusa Israeli moja ya siku hizi, mpaka litalitikisa taifa zima. Hata nabii alilia kwa sauti kuu, na kusema, "Katika siku moja umefanya jambo hili." Katika siku moja, wao wataliona Hilo. Kutakuweko na jambo kuu mno.

80 Kwa maoni yangu, itakuwa ni nabii mwenye nguvu atakayeinuka na kusimama mbele ya Israeli, na kuwathibitishia ya kwamba Masihi huyo angali hai. Huyo Masihi waliyemkataa ni ...?...

Wao wakiisoma hiyo Biblia ndogo sasa, ya Biblia ya Israeli. Wao wanaisoma kinyumenyume, namna wanavyoisoma. Nanyi mnajua jinsi lugha ya Kiyahudi ilivyoandikwa. Na kwa hiyo wakati wanapoisoma ... Nao walisoma ya kwamba Lewi Pethrus aliwatumia, Biblia milioni moja. Walisema, "Kama huyu Yesu ..." Hao walikuwa ni hao Wayahudi walioletwa kutoka Iran, na kule chini, hawajawahi kusikia kitu kama Masihi. Nao walipokuwa tayari kurudi kwenye nchi ya uenyeji wao, mbona, hawangepanda kwenye ndege. Walikuwa wangali wanalima na majembe yao ya zamani. Mlisoma jambo hilo katika gazeti la *Look*. Ni wangapi waliosoma yale makala katika gaze... la *Look* na la *Times*? Mbona, hakika mliyasoma. Mnaona? Hawangeingia mle. Yule rabi mzee alisimama pale na kusema, "Kumbukeni, nabii wetu alisema tungerudi kwenye nchi ya uenyeji wetu kwa mbawa za tai." Haleluya!

Mataifa yanavunjika, Israeli inaamka,  
Ishara zilizobashiriwa na Biblia;  
Siku za Mataifa zimehesabiwa, zimekumbwa na hofu;  
"Rudini, Enyi mliotawanyika, makwenu."

Afadhali mwamke. Mmelisikia na kulisikia jambo hilo, na kulisikia, lakini itakuwa mara ya mwisho, moja ya siku hizi. Israeli wanarudi kwenye nchi ya uenyeji wao. Siku ambayo Mungu anayakinisha Israeli kuwa taifa, hiyo ni ile siku ambayo hakutakuwepo na Mmtaifa mwingine atakayeokolewa.

81 Nitathibitisha jambo hilo kwa majuma haya sabini, kama tu ninaweza kuzipata siku hizo. Ninaenda kwenye...kutafuta kalenda za elimu ya nyota, na—na ya Julia, ile ya elimu ya nyota, na ya Kirumi, na hizo zote. Kuna nyingine, mahali fulani. Kuna kitu fulani. Mungu analijua, na, Yeye—Yeye anaweza kulifunua. Mnaona? Ninajua kalenda ya Julia ina siku mia tatu na sitini na tano na robo ya siku, katika mwaka. Kwa hiyo, loo, wao, wote wamechanganyikiwa, lakini kuna ukweli, mahali fulani.

82 Ninaona makanisa mengi sana, madhehebu mengi sana, watu wengi sana wakienda *hivi*, na wengine, "Salamu maria," na wengine wakiabudu *hiki*, na *kile*, *kinginecho*. Hapana budi kuwe na Kweli, mahali fulani. Hapana budi kuwe na Mungu, mahali fulani. Hapana budi kuwe na Ujumbe, mahali fulani. Ninawaona manabii wa uongo wakiinuka, wakiigiza upambanuzi, na kila namna ya upuuzi unaoendelea. Halafu, hakuna budi kuwe na wa kweli hapo, mahali fulani, ambamo huo wa bandia umeigizia.

83 Ninawaona watu wakiingia katika mwili, na kupiga makelele, na kufanya yasiyofaa, na wakitoka na kuishi maisha ya kila aina. Hakuna budi kuwe na Roho Mtakatifu halisi pale, mahali fulani. Ninawaona watu wakijifanya wa kidini, na kadhalika, na kujaribu kuwa wa kidini. Ninajua kuna Mungu halisi, mahali fulani. Kuna Roho halisi, mahali fulani, maana huyo ni mnafikia wa kale ambaye ameigiza, bandia wa kale. Hapana budi pawe na kitu kilicho halisi: mtu fulani, watu fulani, Kanisa fulani, Mungu fulani. Hapana budi kuwe na kitu fulani kilicho cha kweli, mahali fulani, maana hawa walinakiliwa tu kutoka kwa kitu hicho. Kuna kitu fulani halisi, mahali fulani.

Nililiambia kanisa jambo hili, kuhusu karama zenu. [Ndugu Branham anagonga mimbara mara nne — Mh.] Sikilizeni karama zenu; ziwekeni katika Biblia. Msichukue kabadala, wakati mbingu zimejaa karama za kweli. Hebu tushikilie zile zilizo halisi. Hebu na tuchukue zilizo za kweli au tusiwe na zo zote kabisa. Amina.

84 Sasa, tukifunga, ni kweli kwamba Mungu huwashughulikia Israeli tu wanapokuwa katika nchi ya uenyeji wao. Hebu tuchukue wakati Mungu...Ibrahimu alipoondoka katika nchi ya uenyeji wake akashuka akaenda huko Misri, ni jambo gani lilitukia? Yeye alitoka kwenye mapenzi ya Mungu, naye kamwe hakubarikiwa hata aliporudi kwenye nchi ya uenyeji wake. Mungu kamwe hakumshughulikia, hata ono moja, wala cho chote kile, mpaka aliporudi kwenye nchi ya uenyeji wake.

Waangalie Israeli wakati walipopelekwa chini huko Misri, miaka mia nne. Hakuna hata mwujiza mmoja, hakuna hata ishara moja, hakuna jambo hata moja lilitukia kati yao, halijaandikwa katika histori ya Kitabu hiki. Ni tisini na tisa ile ile ya kale: kuhudhuria kanisani, kutoa mwana-kondoo, kusema "Salamu Maria," ama cho chote kilichokuwa, na kurudi. Mwaka ujao, vivyo hivyo. Makuhani wote walibishana, "Rabi Fulani! Tutamchagua Rabi Fulani. Yeye ana kisomo bora zaidi. Anawajua Wamisri zaidi." Muda si muda wanajua, Wamisri na—na hao wote, walikuwa kitu kimoja.

85 Jambo lilo hilo ndilo limelipata kanisa. Sote tulienda kuwa Wamethodisti, ama Wabatisti, ama Wapresbiteri. "Nasi tuna digrii kutoka Hartford! Tuna digrii kutoka Wheaton! Tuna digrii kutoka mahali pengine, ama Bob Jones! Sisi, tuna Shahada ya Sanaa! Tuna D.D., LL.D., ama kitu kinginecho!" Imekuwa ni kitu gani? Kundi la upuuzi.

Ndivyo ilivyokuwa huko Misri. Wala Mungu kamwe hajawashughulikia Israeli mpaka walipokuja kwenye nchi ya uenyeji wao.

86 Nisikilizeni! BWANA ASEMA HIVI, Mungu hatalishughulikia Kanisa Lake mpaka litakaporudi kwenye nchi ya uenyeji wake, Ujumbe wa wakati huu. Rudini kwenye ule wa asili! Ondokeni kwenye mawazo yenu ya Kimethodisti, Kibatisti, Kipresbiteri; yenu ya Kipentekoste, Kiassemblies, Kiumoja, Kiutatu, na Kiutano, cho chote kile; kanisa la Mungu, Kinazarayo, Kipilgrim Holiness, kanisa la Kristo, yote ni mashirika ya upinga-Kristo! Nami ninatambua ya kwamba huu unasambazwa ulimwenguni. Yote yako makosani; yote ni ya Ibilisi. Loo, jamani! Kuna wacha Mungu katika kila moja la hayo. Kuna wacha Mungu katika kila moja ya mashirika hayo. Lakini hilo shirika, lenyewe, si la Mungu, na kamwe Mungu hatalibariki. Yeye kamwe hajayabariki.

87 Ninamwuliza mwanahistoria ye yote (mtakaoisikia kanda hii) kuniandikia na kuniambia wakati wo wote, kanisa lilipounda madhehebu, kama Mungu hakuliweka kwenye rafu wala hakulishughulikia tena. Niambie ni wakati gani Yeye alipowainua Waluteri tena, Wesley na Wamethodisti, ama Mpentekoste. Kamwe hajawainua! Madhehebu hayo yalika pale, yakaoza na kuharibika! Mungu aliwachukua watu binafsi na kujaribu kuwaelekeza watu warudi kwenye nchi ya uenyeji wao. Halafu basi, hao watu binafsi wakawa wanyonge sana na dondoadume, wakiwa na namna fulani ya digrii, mpaka wakaunda madhehebu mengine, wakayafanya mtoto maradufu wa kuzimu zaidi kuliko yalivyokuwa hapo mwanzoni.

88 Lakini, mahali fulani, hakika, Yehova ana mtu ambaye anaweza kumwekea mikono Yake, ambaye hatapatana nao...yamchayo, madhehebu yasiyomcha Mungu; ambaye atawatikisa watu kuwarudisha kwenye ule Mwamba, Kristo Yesu, kuwarudisha kwenye pentekoste ya awali na Roho Mtakatifu wa awali, yenye ishara na maajabu ya asili. Hakika ana mmoja, mahali fulani, ambaye hatavunjika chini ya namna yo yote ya mateso, atoroke, afutilie mbali, aanguke, wala cho chote kile; ambaye atadumu nalo.

Mungu kamwe hawabariki Israeli mpaka wamerudi kwenye nchi ya uenyeji wao.

89 Mungu hatakubariki kamwe, Mmethodisti, Mbatisti, Mpresbiteri, Mkatoliki, wala Mpilgrim Holiness, Mnazarayo, kanisa la Kristo, ama—ama madhehebu ya Kipentekoste. Yeye kamwe hatakubariki kwa njia hiyo. Rudini kwenye nchi ya uenyeji wenu, mwanzoni, rudini kwenye tukio la kipentekoste kama lilivyotukia kwenye Siku ya Pentekoste wakati Nguvu za Mungu aliye hai zilipobadilisha hao maelfu ya watu, na kuuwasha moyo wao kwa Moto wa Mungu, ulioonesha zile za kweli; si ishara zilizoigwa, si kushirikishana mawazo kwa bandia, si igizo fulani, na kuingia katika mashindano ya kufa na kupona kama tuliyo nayo hapa Marekani. "Ni nani anayeweza kupata hema iliyo kubwa kuliko zote?" Ama, "Ni nani anayeweza kuwa na kundi kubwa kuliko wote?" Inaleta tofauti gani kwa Mungu? Mungu anawataka watu walio waaminifu moyoni, si umati mkubwa wa watu. Nasi sote tuna shindano la kufa na kupona hapa,



tunakimbia mbio. Ni fedheha iliyoje, kuona kama tunaweza kuongezea elfu moja zaidi kwenye madhehebu yetu. Ni aibu. Yeye anatumia tuirodie ile Kweli, turudi kwake Roho, turudi kwenye Nuru ya kweli, turudi kwenye njia kuu katika Kristo, turudi kwenye ile Kweli. Anawezaje kamwe kutubariki kwa jinsi tunavyofanya? Hatatubariki.

90 Yeye kamwe hakuwabarikia Israeli mpaka waliporudi kwenye nchi ya ahadi. Na hapo waliporudi kwenye nchi ya ahadi, ishara na maajabu yalianza kutukia. Yeye alimtuma mtu moja kwa moja miongoni mwao, jina lake Musa. Musa huyu alishuka na kitu gani, theolojia iliyopigwa msasa? Je! yeye alikuja na Shahada ya Sanaa? Je! yeye alishuka na LL.D., Ph.D.? Yeye alishuka na nguvu za Yehova, na ujumbe, "Rudini, kutoka kwenye nchi hii, mwende katika nchi ya uenyeweji wenu. Rudini, Enyi mliotawanyika, makwenu." Amina!

91 Kwa karibu miaka elfu mbili, Wayahudi wamekuwa nje ya nchi ya uenyeweji wao, wametawanywa katika pepo nne za dunia. Jinsi ambavyo tungeweza kuufanya Ujumbe huu uendelee kwa majuma kadha sasa, kama tungeingia kwenye kilindi chake. Tunaweza kuwafuatilia Israeli moja kwa moja huko nyuma na kuonyesha wakati walipotawanywa na Himaya ya Kirumi, baada ya kumkataa Masihi; jinsi walivyofukuzwa wakaenda katika kila taifa chini ya Mbingu.

Turudi kwa Yakobo, Israeli, turudi katika Mwanzo 44 na 45, na kuonyesha huko nyuma vile alivyowabariki hao wazee na kuwaambia mahali pao watakapokuwa hasa katika siku za mwisho. Nami ninaweza kuwaonyesha kabisa (kila taifa) la Israeli, kila kabila la Israeli, likisimama kabisa katika mataifa ambapo ilisema watakuwa. Na tuko hapa leo.

92 Myahudi ambaye tunamjua, huyo si Myahudi halisi hasa. Myahudi halisi ni yule Mworthodoksi ambaye hajajichafua na mambo ya ulimwengu, ambaye hajatoka nje na kujiunga na makanisa mengine. Hao ndio wanaorudi huko ng'ambo, waishio kwa jibini na mkate, huko kwenye mimba ya vilima, wasiokubaliwa katika ule mji wa kale. Iliwabidi kujenga mji upande huu, katika nchi isiyo ya mtu, ambapo bom bom zimeelekezwa pande zote mbili. Lakini ameanza kuchipuza matawi yake. Amina, na amina! Wakati umewadia.

93 Hao hapo Ishmaeli na Isaka, wamesimama pale, wakibishania juu ya nchi hiyo, bado, lakini ni ya Israeli. Ikitokea kwamba uende katika Yerusalemu mpya, hawatakuruhusu kuingia katika Yerusalemu ya kale. Itakubidi kwenda kule kwanza na kuwaacha wakuelezee yote, hao Waarabu, ndipo wakupeleke upande huo mwingine. Hao ni watoto wa Ishmaeli. Lakini, ngoja, utakuja wakati ambapo watoto wa Mungu wataitaka. Hiyo ni kweli. Yerusalemu itajengwa tena. Sadaka ya kila siku itaanzishwa.

Na mpinga-Kristo atafanya agano kwa hayo majuma saba ya mwisho. Na katikati ya hayo, atavunja agano hilo, awaingize wote kwenye Ukatoliki. Chukizo litaenea juu ya mahali pote, namna hiyo, na hapo ndipo ule mwisho utakapokuja.

94 Angalia, "majuma sabini." Naam, wana karibu miaka elfu mbili nje ya nchi yao; sasa wamefukuzwa, wao ni watu kama ilivyokuwa katika kule kuufanya mgumu moyo wa Farao, ilimbidi kuufanya mgumu moyo wa Hitler. Mamilioni yao walikufa. Mwangalie huyu Eichmann, mwenye hatia ya kuwaua Wayahudi milioni sita. Watu milioni sita, nafsi za wanadamu, watoto wachanga, watoto, watu wazima, wote waliuawa; Eichmann, mtu mmoja. Angalia Urusi, jinsi ilivyowafukuza kutoka kule. Waliwafukuzwa kila mahali. Wamekuwa taifa lililodharauliwa.

Lakini kwa sababu ya kupenda fedha kwao, walirudi tena. Lakini kundi hilo dogo linarudi kule Palestina. Amina, ndugu! Utakapowaona wakianza kurudi kwenye nchi ya uenyeweji wao!

95 Sasa wana watu wa kutosha kule kufanya hiyo kukaribia mia na arobaini na nne elfu. Na ni kitu gani kinachotendeka? Wao watamjua Yusufu wao. Msiwe na wasiwasi. Naam, bwana. Nao wote wamesimama pale walingoja jambo hilo litukie. Na ile saa ambayo hasa...

Mataifa yamewatangaza kwamba wao ni taifa, mwaka huu uliopita. Jambo hilo litakapotendeka, tuko karibu na mwisho, Kanisa la Mataifa limeondoka. Kwa hiyo, karibu wakati wo wote, Mungu angeweza kusema, "Israeli ni watu Wangu." Hilo litakapotukia, Mataifa wamekwisha.

96 "Watakanyaga," kasema Yesu, katika Mathayo 24. "Chukizo la uharibifu, watakanyaga kuta za Yerusalemu hata wakati wa Mataifa utakapotimia." Wakati hayo yatakapokwisha, ndipo Wayahudi watakaporudi Yerusalemu, kuanzisha upya lile hekalu na ibada za hekaluni. Tutapata jambo hilo lote katika Jumbe hizi zinazokuja, majuma sabini ya zile sababu sita.

Sasa nitazisoma hizo kabla sijafunga, maana karibu saa imewadia kwa sisi kwenda nyumbani, halafu turudi usiku kwenye saa moja.

97 Kwanza, kwanza, kama unaliandika, "Ili kukomesha makosa." Danieli, mlango wa 9, kifungu cha 24. "Kukomesha makosa," moja. "Kuishiliza dhambi," mbili. "Kufanya upatanisho kwa ajili ya uovu," tatu. "Kuleta haki ya milele," nne. "Kutia muhuri ono na unabii," tano." "Kumtia mafuta yeye aliye Mtakatifu

sana," sita. Na hilo ndilo ambalo tutazungumzia usiku wa leo. Mungu, akitimiza!

98 Sasa ngoja, hebu nilirudie tena, ili mlipate. Kwanza, "kukomesha makosa." Pili, "kuishiliza dhambi." Tatu, "kufanya upatanisho kwa ajili ya uovu." Nne, "kuleta haki ya milele." Tano, "kutia muhuri ono na unabii." Sita, "kumtia mafuta aliye Mtakatifu sana." Hebu niwasomee sasa, kutoka katika Biblia. Ni aya ya 24.

*Sabin...majuma sabini umeamriwa juu ya watu wako, (Wayahudi) na juu ya mji—juu ya mji wako mtakatifu, (Israeli, Wayahudi, Yerusalemu), ili kukomesha...makosa (moja),... kuishiliza dhambi (mbili),...kufanya upatanisho kwa ajili ya uovu (tatu),...kuleta haki ya milele (nne), na kutia muhuri maono (tano)—ono na unabii, na kumtia mafuta yeye aliye Mtakatifu sana (sita).*

Hayo ndiyo hasa Yeye aliyokuja kumwambia, yatakayotendeka, ndipo mwisho uje.

Sasa, usiku wa leo tutaona mambo hayo ni nini, na tuone jinsi tulivyo karibu na mahali hapo. Ndiposa Jumapili ijayo, tutaingiza na kuweka kwenye mahali pake mambo haya ya wakati mahali pale hasa tunaposimama. Ninampenda.

99 Israeli wakirudi katika nchi ya uenyaji wao, Israeli. Hebu niseme tu jambo hili sasa wakati ... Nadhani haliko kwenye kanda. Hebu niseme jambo hili. Saa ile ile ambapo Israeli walifanyika taifa ... Sababu ambayo nimeamini daima, mbele ya darasa langu hapa, ya kwamba kulikuwa na jambo fulani ningeshiriki, kabla sijafa, la kuwarudisha Israeli kwa Bwana. Kwa sababu, wakati saa ile ile, kwa jedwali la Pan Amerikan, ambapo Israeli walitangazwa kuwa taifa, kwa mara ya kwanza katika miaka elfu mbili tangu watawanywe, si taifa tena; ilikuwa ndiyo saa ile ile hasa, ambapo Malaika wa Bwana alikutana nami kule na kunituma kwa...na Injili. Jambo lile lile, Mei 7, 1946.

Sasa, basi, jambo lingine linalonifanya kujua. Ni "kugeza mioyo ya watoto iwaelekee baba zao, na mioyo ya baba iwaelekee watoto wao," ule Ujumbe. Angalia, Malaki 4 (si 3), 4!

100 Jambo lingine. Wakati, Billy, mimi na mwanangu, Ndugu Ern Baxter, tulipokuwa tukienda zetu Palestina, baada ya kukutana na Wayahudi kwa Ndugu Arganbright, nao wakauona huo mkutano. Lewi Pethrus alikuwa ametuma Biblia hizi kule. Naye akasema ... Wayahudi hawa walikuja, wakasema, "Kama utaita kundi la viongozi wa Israeli, ninamaanisha, si hawa marabi wa kisasa na sherehe zao zote, lakini uwakusanye viongozi weneyewe hasa wa Israeli pamoja. Nasi tumesoma Agano hili Jipya, na tunajua ya kwamba Masihi atakapokuja, Yeye atatwambia mambo haya, kama yule mwanamke kule Samaria. Tunajua ya kwamba Musa alisema Masihi wetu angekuwa nabii. Na utakapoweza kuwaambia na kuwaonesha, kwa Maandiko," jambo hilo ambalo tutapata katika Ujumbe wa usiku wa leo, "ya kwamba iliwabidi kutiwa giza na mioyo yao kukatwa, ili kwamba nafasi ya Mataifa ije, ili kwamba tuwe na wakati wa kupatanishwa kwa Mataifa. Nayo mioyo yao ilifanywa migumu kama vile vile ilivyokuwa katika wakati wa Yusufu, na kadhalika. Na ndipo tuwalete hao Wayahudi mpaka mahali fulani, na kuwaita watu hao kutoka miongoni mwa watu waliopo, kama tu vile unavyowafanyia hawa Mataifa hapa, kwa uvuvio huo wa Roho." Maana, wao walisema, "Kama Yesu huyu, kama Yeye ndiye Masihi, na maneno yako ni kweli, basi Yeye si mfu, pia yu hai. Na kama Yeye yu hai, Yeye aliahidi kuwa katika ninii Yake...mtu-...mtumishi Wake—watumishi, wanafunzi Wake. Basi kama tunaweza kumwona akifanya ishara ya nabii, basi tutaamini ya kwamba Yeye ni Masihi."

Ni jambo kamilifu lililoje, ni sawa kabisa. Basi, hilo lingefanya nini? Taifa lingezaliwa katika siku moja, miongoni mwa viongozi. Kila mmoja wao angesema, "Tunajua jambo hilo." Wakati huyo rabi anaposema hivyo, hilo latosha. Taifa lingezaliwa katika siku moja. Israeli wangezaliwa katika siku moja.

101 Nami nilikuwa nikienda zangu, ndipo nikasimama Cairo, Misri, tikiti ikiwa mkononi mwangu, na zimesalia dakika kumi na tano tuitwe. Wao walikuwa wakijiandaa kutangaza. Ndipo nikashuka nikaenda kuangalia kipande cha huu mpingo, kilichokuwa kimechongwa sanamu ya ndovu mdogo kwa mpingo, akiwa na pe— pembe za kipusa. Nilikuwa niitumie rafiki yangu daktari, Dr. Sam Adair, kama ya kukandamizia karatasi. Nami nilikuwa nikiangalia. Ndipo kitu Fulani kikaniambia, "Huu bado si wakati. Iache Palestina."

Kwa hiyo nikawaza, "Hilo lilikuwa ni mimi tu nikiwaza hivyo." Nami nikaendelea.

Kitu fulani kilisema, "Huu siyo wakati."

Ndipo nikatoka nikaenda nyuma ya lile banda. Nikamwinulia Mungu kichwa changu. Nikasema, "Mungu, je! ni Wewe uliyekuwa ukinena nami?"

Kasema, "Wakati haujawadia. Usiende Palestina. Wakati haujatimia." Ndipo nikachukua tikiti yangu na kuibadilisha, nikatoka huko nikaenda kupitia Rumi, ndipo nikarudi Lisbon, katika Ureno, halafu kutoka kule nikarudi Marekani.

102 Saa ilikuwa haijawadia bado. Maovu ya Mataifa hayajajaa bado, mpaka pomoni mwa kikombe. Lakini

siku moja hilo litatimia, ndipo Mungu atamtuma mtu fulani kule ambaye ni nabii, naye atawathibitishia. Ninatumaini ya kwamba Mungu atamwinua mara moja, ye yote yule, ambaye atamwinua upesi. Ninaamini jambo hilo halina budi kuja. Hiyo ndiyo sababu ya sisi kujifunza hili, kwamba tumekaribia sana.

103 Na, kumbukeni, dakika ile ile ambapo Wayahudi watampokea Kristo, Kanisa la Mataifa limeondoka. Ndipo Mataifa watamwagiwa mapigo, ile Dhiki.

Basi—basi watu, waalimu mashuhuri wanawezaje kufundisha, na huku wanaingalia Biblia hii namna hii, na kusema ya kwamba Kanisa litapitia kwenye ule wakati wa ile Dhiki, wakati hakuna Maandiko katika Biblia yanayosema jambo hilo! Hawana jambo hata moja.

104 Mtu fulani aliniambia, si muda mrefu uliopita, kasema, "Loo, Dada McPherson alifundisha ya kwamba Kanisa lingepitia kwenye ile Dhiki, maana tutakuwa mianga ing'aayo katika wakati huo." Ni Israeli wakati huo, si Mataifa.

Mataifa tayari wameondoka, lile Kanisa. Haitawabidi kupitia katika Dhiki yo yote. "Lile joka lilitapika maji kutoka katika kinywa chake," sura ya 17, "na kufanya vita na wale masalia," yule mwanawali mjinga. Si ... Lile kanisa halisi liliondoka. Yeye yuko kwenye Karamu ya Arusi kwenye ninii hizi, kipindi cha wakati ambapo Karamu ya Arusi itakuwa inaendelea, lile juma la mwisho. Na hapo ndipo ile Dhiki itakapoanza, wakati wale nzige na mateso yatakapoinuka juu ya makanisa, mambo kama hayo.

Kisha, mwishoni, katika sura ya 19, Huyu hapa anakuja pamoja na Bwana Arusi Wake. Haleluya! "Mfalme wa wafalme, na Bwana wa mabwana; vazi lililochovywa katika Damu, na majeshi ya Mbinguni yamepanda farasi weupe, wakija pamoja Naye. Huyu hapo Bibi-arusi anakuja, kuchukua mahali Pake kwa ajili ya ule Utawala wa Miaka Elfu. Amina! Loo!

Heri ni Jina, loo, heri ni Jina,  
Heri ni Jina la Bwana;  
Heri ni Jina, loo, heri ni Jina,  
Heri ni Jina la Bwana.  
Yesu ni Jina, Yesu ni Jina,  
Yesu ni Jina la Bwana;  
Yesu ni Jina, loo, Yesu ndilo Jina,  
Yesu ni Jina la Bwana.  
Litukuze Jina Lake, loo, litukuze Jina Lake,  
Loo, litukuze Jina la Bwana;  
Litukuze Jina, loo, litukuze Jina,  
Litukuza Jina la Bwana.

105 Unalitukuza namna gani? Unalitukuza katika maisha yako. Unaishi maisha mazuri hivi kwamba wao wanaweza kusema, "Huyo hapo mtumishi wa Kristo." Hivyo ndivyo unavyolitukuza Jina hilo. Hebu tuone. Loo, hivi hamumpendi? [Kusanyiko linasema, "Amina." - Mh.] Loo, jamani! Wimbo wetu mdogo sasa:

Katika hori zamani za kale, najua ndivyo ilivyo kweli,  
Mtoto mchanga alizaliwa awaokoe watu na dhambi zao.  
Yohana alimwona ufukweni, Mwana-Kondoo milele, Huyu Mwana-Kondoo akiwa na  
hiyo Mihuri Saba, ndiye tu pekee Mbinguni na duniani aliyeweza kukitwaa.  
Katika ho- ... Katika hori zamani za kale, ninajua ndivyo ilivyo kweli,  
Mtoto mchanga alizaliwa awaokoe watu na dhambi zao.  
Yohana alimwona ufukweni, Mwana-Kondoo milele,  
Loo, heri ni Jina la Bwana.  
Loo, heri ni Jina, loo, heri ni Jina,  
Heri ni Jina la Bwana;  
Heri ni Jina, heri ni Jina,  
Heri ni Jina la Bwana.

106 Ninapenda kuabudu. Nanyi je? [Kusanyiko linasema, "Amina." - Mh.] Sasa, hatuji kanisani kusikia tu mahubiri; hayo yanaambatana nalo. Lakini tunakuja kanisa kuabudu, kuabudu katika Roho na Kweli. Mmesikia Kweli; hilo ni Neno. Mnaona? Sasa, kuabudu, ni kujieleza mwenyewe Kwake. Mnaona?

*Loo, Nampenda Yule Mtu wa Galilaya!* Tupe sauti kidogo ya huo. Naam, bwana. Unaujua, Teddy? Ninasahau sasa. Hebu tuone. Hebu tuone.

Loo, nampenda yule Mtu kutoka Galilaya, kutoka Galilaya,  
Kwani amenitendea mambo mengi mno.  
Yeye amenisamehe dhambi zangu zote, akaweka Roho Mtakatifu ndani;  
Ee, nampenda, nampenda yule Mtu kutoka Galilaya.  
Mtoza ushuru alikwenda kuomba hekaluni pale siku moja,  
Akalia, "Ewe Bwana, nihurumie!"  
Alisamehewa kila dhambi, na amani kuu ikawekwa ndani;

Akasema, "Njooi, mumwone Mtu huyu kutoka Galilaya."  
 Ee, nampenda yule Mtu kutoka Galilaya, kutoka Galilaya,  
 Kwani amenitendea mambo mengi mno.  
 Alinisamehe dhambi zangu zote, akaweka Roho Mtakatifu ndani.  
 Ee, nampenda, nampenda yule Mtu wa Galilaya.  
 Vilema waliwezesha kutembea, bubu wakawezeshawa kusema.  
 Ile nguvu ilinenwa kwa upendo baharini.  
 Vipofu waliwezesha kuona, najua ingewezekana tu  
 Zile nguvu za yule Mtu kutoka Galilaya.  
 Ee, nampenda yule Mtu kutoka Galilaya, kutoka Galilaya,  
 Kwani amenitendea mambo mengi mno.  
 Yeye amenisamehe dhambi zangu zote, akaweka huyo Roho Mtakatifu ndani.  
 Ee, nampenda, nampenda huyo Mtu kutoka Galilaya.

Msikilizeni huyu.

Yule mwanamke pale kisimani, Yeye alisema dhambi zake zote,  
 Jinsi alivyokuwa na waume watano wakati ule. (Huyo ni Yeye.)  
 Alisamehewa kila dhambi, na amani kuu ikaja ndani;  
 Akalia, "Njooi, mumwone yule Mtu kutoka Galilaya!"  
 Ee, nampenda yule Mtu kutoka Galilaya, kutoka Galilaya,  
 Kwani amenitendea mambo mengi mno.  
 Yeye amenisamehe dhambi zangu zote, akaweka Roho Mtakatifu ndani.  
 Ee, nampenda, nampenda huyo Mtu kutoka Galilaya.

107 Nampenda. Nanyi je? [Kusanyiko linasema, "Amina." - Mh.] Moyo wangu wote! Nanyi je? ["Amina."]  
 Yeye si ni wa ajabu? ["Amina."]

Ee, wa ajabu, wa ajabu, Yesu alivyo kwangu, (Yeye ni nini?)  
 Mshauri, Mfalme wa Amani, Mungu Mwenye Nguvu;  
 Ee, akiniokoa, akinilinda kutokana na dhambi yote na aibu,  
 Mkombozi wangu ni wa ajabu, Jina Lake lisifiwe!

Hebu na tuinamishe tu vichwa vyetu sasa na tuwazie jambo hilo.

Nilikuwa nimepotea wakati mmoja, lakini sasa nimepatikana, niko huru na hukumu,  
 (mataifa yanavunjika; haijalishi)  
 Yesu anatupa uhuru na wokovu kamili;  
 Yeye ananiokoa, ananilinda kutokana na dhambi yote na aibu,  
 Mkombozi wangu ni wa ajabu, Jina Lake lisifiwe.  
 Loo, wa ajabu, wa ajabu, Yesu alivyo kwangu,  
 Mshauri, Mfalme wa Amani, Mungu Mwenye Nguvu;  
 Akiniokoa, akinilinda kutokana na dhambi yote na aibu,  
 Mkombozi wangu ni wa ajabu, Jina Lake lisifiwe!

Loo, wazia jambo hilo!

Wakati mmoja nilikuwa nimepotea, sasa nimepatikana, niko huru na hukumu,  
 Yesu anatupa uhuru na wokovu kamili;  
 Ananiokoa, (Yeye anafanya nini?) Akinilinda na dhambi yote na aibu, (akitembea juu  
 yake)  
 Ee, Mkombozi wangu ni wa ajabu, Jina Lake lisifiwe.

Sasa sote kwa pamoja!

Loo, wa ajabu, wa ajabu, Yesu alivyo kwangu,  
 Mshauri, Mfalme wa Amani, Mungu Mwenye Nguvu;  
 Mbona, akiniokoa, akinilinda na dhambi yote na aibu,  
 Mkombozi wangu ni wa ajabu, Jina Lake lisifiwe.  
 Loo, jinsi ninavyompenda Yesu, (utukufu!)  
 Loo, jinsi ninavyopenda ...

Nina furaha sana kwamba nimeokoka! Nina furaha sana ninakungojea Kuja Kwake!

Loo, jinsi ninavyompenda Yesu,  
 Kwa sababu Yeye alinipenda kwanza.

Sasa huku tumeinua mikono yetu juu, kama tunamaanisha jambo hilo.

Kamwe sitamwacha Yeye,  
 Kamwe sitamwacha Yeye,  
 Kamwe sitamwacha Yeye,  
 Kwa sababu Yeye alinipenda kwanza.

108 Je, mnampenda? [Kusanyiko linasema, "Naam." - Mh.] Basi hamna budi kupendana. Maana, kama huwapendi wale unaoweza kuwaona hata hapa, unawezaje kumpenda Yeye Ambaye hujapata kumwona? Na tupeane mikono sisi kwa sisi, tuseme:

Loo, jinsi ninavyompenda Yesu,  
 Loo, jinsi ninavyompenda Yesu,  
 Loo, jinsi ninavyompenda Yesu,  
 Kwa sababu Yeye alinipenda kwanza.  
 Kamwe sitaninii ... (Inueni mikono yenu juu Kwake sasa. Ndivyo ilivyo.) ... -Mwache,  
 Kamwe sitamwacha Yeye,  
 Kamwe sitamwacha Yeye,  
 Kwa sababu Yeye alinipenda kwanza.

109 Wazia tu, Yeye alitujulisha ufunuo huo mkubwa. Hivi hatupendi? [Kusanyiko linasema, "Amina." - Mh.] Yeye si ni wa ajabu? ["Amina."] Jinsi tunavyoshukuru kwa ajili ya Bwana wetu Yesu; kamwe usituache. "Loo, niko pamoja nanyi siku zote, hata..." Je! Mnayafurahia yale *Majuma Sabini Ya Danieli*? ["Amina."] Loo, si tunampenda? Yeye anafanya jambo hilo namna gani?

Imani yangu inakutazama Wewe,  
 Wewe Mwana-Kondoo wa Kalvari,  
 Mwokozi ...

Mwabuduni tu Yeye, kutoka moyoni mwako.

Sasa nisikie ninapoomba,  
 Ondoa dhambi zangu zote,  
 hebu niache tangu leo  
 Kuwa Wako kikamilifu!  
 Wakati ninapopitia maisha yenye utata gizani, (sote tunapitia)  
 Na majonzi yakiwa yamenizunguka, (Naam, Bwana.)  
 Uwe tu kiongozi Wangu; (Ukiongoza katika hilo, Bwana.)  
 Amuru giza ligeuke kuwa mchana,  
 Futa woga wa huzuni,  
 Wala usiniache nipotoke  
 Nitoke kando Yako.  
 [Ndugu Branham anaaza kuvumisha *Yesu Kwa Imani*]  
 Nguvu kwa moyo wangu unaozimia,  
 Bidii yangu huchochea;  
 Agiza giza ligeuke kuwa mchana,  
 Ondoa woga wangu wote,  
 hebu niache tangu leo  
 Niwe Wako kikamilifu!

110 Ee Yesu, tunaona tunakaribia jambo fulani. Nabii Isaya alikuwa amenena habari zake; Yeremia alikuwa amenena habari zake. Danieli aliangalia nyuma akaona walioyokuwa wamesema. Iliufanya moyo wake kuchangamka, naye—naye akauelekeza uso Wake Mbinguni. Akafunga, nguo za magunia na majivu. Alitaka kusikia, ili kwamba aweze kuwaonya watu.

Bwana, tunaona kwa Vitabu, pia, Kitabu Chako, Kitabu cha Isaya, Kitabu cha Yeremia, Kitabu cha Yakobo, Yohana, Luka, Marko, Mathayo, Kitabu cha Ufunuo, Vitabu Vyako vyote, ya kwamba tuko karibu na mwisho. Nasi tumezielekeza nyuso zetu Mbinguni, katika maombi, kusihi, kuona mahali tunapoishi, Bwana. Tunaanza kuona mapambazuko. Na, Bwana, tunakuja Kwako. Imani yetu inakuangalia Wewe sasa. Tukiweka kando kila mzigo, na kila dhambi, kila kutokuamini kudogo ambako kungetuzinga kwa upesi, tunakaza mwendo sasa kuelekea mede ya wito mkuu, tukijua ya kwamba wakati wetu ni mdogo.

111 Wabariki watu hawa hapa ndani, Bwana. Wanakupenda. Wao ni Wako. Wametoka. Wewe ndiwe unayefunua. Tunaomba ya kwamba utatujalia mambo haya tunapokungojea.

Tupe alasiri njema ya kusoma, Bwana. Tupe ufahamu. Turudishe tena usiku wa leo, wenye nguvu. Bwana, nitie upako lasiri hii, ee, Bwana, ninaposoma zile sababu sita za kuzuru kwa Gabrieli. Kama Gabrieli alikuja kuzuru na akatoa maana sita, Bwana, hatuna budi kujua hayo. Tumesovisoma vitabu na kujua ya kamba tuko karibu. Kwa hiyo tunaomba ya kwamba Wewe utatufunulia sisi usiku wa leo.

Jumapili ijayo, Bwana, Ee Mungu, ziingize hizo siku humo. Sijui, lakini Wewe unaweza kutuleta moja kwa moja kwenye wakati huo. Tujalie, Baba. Tunakutazamia. Tunapendana sisi kwa sisi na Damu ya Yesu Kristo, Mwana wa Mungu, imetusafisha na dhambi zote. Tunakuangalia Wewe sasa. Tusaidie tunapokungojea Wewe, Baba, katika Yesu Bwana wetu.



[www.messagehub.info](http://www.messagehub.info)

Mahubiri Na  
**William Marrion Branham**  
"... katika siku za sauti ..." Ufu. 10:7